

MARK

*Yia John Kaltjirrpulhelanhelanhiperra
(Matthew 3:1-12; Luke 3:1-18; John 1:19-28)*

¹ Nhanha Yia Marra Jesua Kristiperra nama, Altjirraka 'Liriperra. ² Altjirraka urrpia Isaiiah erakimparra nhanga ilaka, "Atha urrpia nukanha unkwanganga arrkurla yairnama. Era kala unkwanga tjaiya urrkaputjina.

³ Artwa nyinta worritjala ilkama, 'Rrangkarra Inkartaka tjaiya mpaarai, ekura tjaiya arratja inthorra urrkapai.' "

⁴ John Kaltjirrpulhelanhelanha era worritjala naka. Era relha ntjarranha ilaka, "Altjirruna toperrai. Kurunga pitjai atha rrangkarranha kaltjirrpulhelitjinanga, Altjirralla turta korna rrankangarranha iwutjinanga."

⁵ Relha Judea-arinya ingkarraka, relha Jerusalem-arinya ingkarraka turtantama Johnurna lhaka. Etna John-aka ilalhaka etna relha kornarintja namanga. Era turta etnanha Jordan lhirala kaltjirrpulhelaka.

⁶ Mantarra nhanga John-anhala ekarralhakala, nhanha camel ponganga mpaarakala. Era turta mantarra ekuranha yinpa belt-ala yirnitjata. Era intaltja, ngkwarla urltampa turta ilkutjata.

⁷ John-ala relha ntjarranha ilaka, "Artwa arpunha nukanga ingkarna pitjima. Era nukanga ekarltalkura nama. Yinga itja yalknga nama,

topanamala sandal ekuranha paka ilutjika.
⁸ Arai, atha rrangkarranha kwatjala kaltjirrpulhelaka. Era pula rrangkarranha Enka Alkngaltarala kaltjirrpulhelitjina.”

*John-ala Jesuanha kaltjirrpulhelaka
 (Matthew 3:13-17; Luke 3:21,22)*

⁹ Anma Jesuanha John-urna lhaka, pmara Galilee-angatjina, Nazareth town-anga. John-alantama erinha Jordan Lhivala kaltjirrpulhelaka. ¹⁰ Jesuanha warta kwatjanga rrataka, kanha era araka alkira era altjurerramanga, Enka Alkngaltara turta nturrurta ngerra eku-rakaraka tnanpentjimanga. ¹¹ Era turta Altjirranha wuka alkiranga ekururna angkamanga, “Unta ‘Lira nuka nama. Yinga unkwanga kngarra inthorra kangkama.”

*Satan-ala Jesuanha arrkarnaka
 (Matthew 4:1-11; Luke 4:1-13)*

¹² Nhanhiperra Enka Alkngaltarala Jesuanha worritjurna yairnarlenaka. ¹³ Jesuanhantama arlta 40 worritjala naka. Satan-ala turta erinha arrkarnaka. Jesuanha tnontha itnura ntjarralela naka. Angel ntjarrala turta erinha ntarntaraka.

*Jesuanha tjontaka relha ntjarranha
 kaltjinhitjika*

(Matthew 4:12-17; Luke 4:14,15)

¹⁴ Etna John-anha kala errkukalangantama, Jesuanha Galilee-urna lhaka. Erantama relha ntjarranha Altjirrakka Yia Marra ilaka. ¹⁵ Era

etnanha ilaka, “Antala nhang a Altjirrala ar-
rkurla kuta ingkairnakala relhanha tangkalhe-
litjika, kala namantama. Altjirranha kala relha
ingkarrakaka ntelalhitjikerrama, era Ingkarta
etnaka namanga. Lakinhang a rrankarra korna
kuta ntelalhitjalai, kala Altjirruna toperrai, Yia
Marra erinha turta tnakai.”

*Jesuala irrpannga errkunherrkunha 4 ur-
raraka kurtungurla ekuranha nitjika
(Matthew 4:18-22; Luke 5:1-11)*

¹⁶ Jesuanha nhang a Galilee ntjanganga anker-
rala lhapalhamalanga, era Simon-anha, tjia
ekuranha Andrew-anha turta araka, eratharra
net kwatjurna iwumanga, irrpannga errkutjika.
Eratharra kunha irrpannga errkunherrkunha
naka. ¹⁷ Jesualantama erinhatharra ntangkaka,
“Nukanga tnaartangala pitjai. Atha kala
mpalanha kaltjinthitjina relhanhatitjantama er-
rkutjika.” ¹⁸ Kanhang a eratharra kala net eku-
ratharrakanha ipmintja impurlalhaka, Jesuanga
tnaartangala lhaka turta.

¹⁹ Anpara lhamala, Jesuala Zebedee-
aka worra tharra araka, James-anha,
John-anha turta. Eratharra boat-ala
narlanaka, net nhang a tjepakalhakala,
thanthalanamala. ²⁰ Erinhatharra aramala,
Jesuala erinhatharra turtantama ntangkaka.
Kaarta ekuratharrakanha, urrkapunhapunha
ntjarranha turta boat-aka impurlalhamala,
eratharra kala Jesuanga tnaartangala lhaka.

*Artwa enka kornakarta
(Luke 4:31-37)*

²¹ Etna Capernaum town-urnantama lhaka. Kurunga Sabbath arltala Jesuanha Synagogue-urnantama irrpuka, era relha ntjarranha kaltjinhaka turta. ²² Etna angkatja ekuranhaka tnohkaka. Erataka etnanha angkatja ekarltala kaltjinhaka, itja Intarrangaltha ntjarrala ngerra.

²³ Jesuala etnanha kaltjinthamalangantema, artwa enka kornakarta synagogue-urna irrpentjika. ²⁴ Artwa erantama intarra ilkaka, “Jesua Nazareth-arinyai, iwukama unta pitjika? Nurnanha yirralhelitjikama unta pitjika? Yinga unkwanga kaltja. Unta kunha Altjirraka Urrpia Alkngaltara Era.”

²⁵ Jesualantama enka korna erinha rralthamala ilaka, “Tjukunyerrai! Artwa ekuranga rratai!” ²⁶ Enka korna erantama artwa erinha arnaka ilatuka. Ilkarlalthamalangantama, enka korna era artwa ekuranga rratarlalhaka.

²⁷ Nhanha aramala relha ingkarraka tnohkaka. Etnantama pmarrarraka, “Iwunhama lakinha? Erataka nurnanha angkatja arrpunha inthorra kaltjinhama, angkatja ekarltala turta. Era enka korna ntjarranha turta turnamalanga, etna ekura kala kangkwanterrama.” ²⁸ Yia Jesuiperra kala Galilee ntjaparurnantama ntakerranhaka.

Jesuala Simon-aka mara marrilaka, relha menta ntjarra arrpunha turta

(Matthew 8:14-17; Luke 4:38-41)

²⁹ Kala synagogue-anga rratamala ngerra, Jesuanha James John tharrakarta, Simon Andrew tharraka ilthurna lhaka. ³⁰ Simon-aka maratata

menta intaka, wumpia inthorra. Etnantama Jesuanha nhanha ilaka, era irrpentjimanga ngerra. ³¹ Jesuanhantama arrkutja ekurna lhaka. Erinha iltjanga errkumala, era erinha kamalhelaka. Simon-aka mara kala marrerrakantama. Erantama etnaka marna etaka.

³² Kala ngurrangurrerrakalangantama, lirnnga turta kala irrpukalanga, pmararinya ntjarala relha menta, relha enka kornakarta turta Jesurna kngitjika. ³³ Kala pmararinya ingkarakantama Simon tharraka ilthala worlerraka. ³⁴ Jesualantama relha menta arrpunhakarrpunhakarta etnanha marrilaka. Era enka korna ntjarranha turta unpurlenaka. Enka korna etna kala Jesuaka kaltja naka. Jesuala pula etnanha parraka, etna itja ekuriperra angkitjika.

³⁵ Ingutnhala inthorra Jesuanha kamerraka. Erantama pmaranga rratamala lhaka, nyintarinya nitjika, Kaarta ekuranhurna ingkitjika. ³⁶ Simon ntjarralantama ekura yonthaka. ³⁷ Erinha arltaramala, etna erinha ilaka, "Arai, relha ingkarrakalataka unkwanga yonthama."

³⁸ Jesuala pula etnanha ilaka, "Mpa, nurna pmara arrpunha ntjarrurna turta lhiai. Nukathaka nama relha etnanha turta Yia Marra erinha kaltjinhitjika. Nhanhakakwa kunha yinga pitjikala." ³⁹ Jesuanhantama pmararrpaninhurna lhaka Galilee-ala. Synagogue nyintaminyintala era relha ntjarranha Yia Marra erinha kaltjinhaka, era enka korna ntjarranha turta unpurlenaka.

*Jesuala artwa leprosy-akartanha marrilaka
(Matthew 8:1-4; Luke 5:12-16)*

⁴⁰ Artwa nyinta leprosy-akarta Jesuurna pitjika, ekuranga urlarra mparalela turta arrarnalhaka. Ngkangkawulhamala, era Jesuanha ilaka, “Unta paka antja namanga, unta yinganha kala irrpalthala marrilamara.”

⁴¹ Jesuanha ekura konyerraka. Erinha iltjala anpumala, era erinha ilaka, “Yinga antjakwia. Atha nganha kala marrilama.” ⁴² Artwa ekura leprosy-ntama kala yirralalhaka. Artwa era turta kala marrerraka.

⁴³ Erinha yairnarlenitjinala, Jesuala erinha ilaka, ⁴⁴ “Arai, unta itja relha arrpunhanha nhandhiperra ilitjika. Kala priest-akanta ntelalhai. Unta turta Altjirranha tjauwerrilya nthai Moses-ala relha ntjarranha turnakala ngerra. Unta lakinhilitjika, relha ntjarra kaltja nitjinanga unta kala marrerrakalantama.”

⁴⁵ Jesuanha impurlalhamala ngerra pula, artwa era kala relha ingkarrakanha Jesuiperra ilakantala, nhanga Jesuala erinha marrilakala. Lakinhangha Jesuanha yarnantama town arpunha ntjarrurna alkngatharra lhaka. Era kala kthalantama naka. Relha etna pula kalantema ekururna worlerraka.

2

*Jesuala relha ntjarranha ntelaka era relhaka
korna irrpalthala iwuma, artwa thaarranha mar-
rilamala
(Matthew 9:1-8; Luke 5:17-26)*

¹ Jesuanha wotha Capernaum-urna alpuka. Era kala arlta urrputja town ekurala nakalantama, relha ntjarrala wuka era pmarala namanga. ² Relha ntjarra inthorantama iltha eku-ranhurna irrpuka. Relha arrpunha ntjarra turta reoala itnaka, yarna irrpumala. Jesualantama etnanha kaltjinhaka.

³ Artwa ⁴ arrpunhalantama artwa thaarranha Jesuurna kngitjika. Artwa erataka ntjamala intaka. ⁴ Etna pula yarna Jesuurna etinyerraka, worla kngarrala tjaiya parramanga. Etnantama iltha kartninyaka ntjika. Jesuanga kartna, etna roof erinha altjurilaka. Kurunga etna artwa thaarra erinha tnanpulhelaka, era ntjama eku-ranhala intamanga kuta.

⁵ Jesuala aramalanga etna erinha kngarra tnakamanga, era artwa thaarra erinha ilaka, “Lira nukai, atha korna unkwanganha iwuka.”

⁶ Artwa Intarrangaltha urrputja tanhala naka. Angkatja nhanha wumala etna eterraka, ⁷ “Iwunhangala era lakinha angkama? Erataka Altjirranha arrampowuma. Altjirralanta kunha relhaka korna irrpalthala iwuma.”

⁸ Jesuala kala lhangkaraka etnala eterramalaka. Erantama etnanha pmarraka, “Iwunhangala rrangkarra lakinha eterrama? Yin-ganha nhanha ilai. ⁹ Iwunhama rukaralkura nama? Artwa thaarra nhanha erinha ilitjika, ‘Atha korna unkwanganha iwuka?’ Erinha ilitjika paka, ‘Kala kamerrai, ntjama unkwanganha tjurnai, nthulapai turta?’ ¹⁰ Relhaka ‘Lira era nthurpa relha ingkarrakaka korna

irrpalthala iwuma. Atha rrangkarranha nhanha kala ntelitjina.” Jesualantama artwa thaarra erinha ilaka, ¹¹ “Kamerrai! Ntjama unkwanganha tjurnamala, kala alpai.”

¹² Artwa era kala kamerrakanta. Era ntjama ekuranha tjurnamala, rratanhaka, relha ingkar-rakanga alknghatharra. Relha etna pula tnolkaka. Etnantama Altjirranha tnantjaka, lakinha angkamala, “Nurna itja lakinha ngerra arrkurla araka paka.”

Jesuala Levi-anha ntangkaka ekuranga tnaartangala pitjitjika

(Matthew 9:9-13; Luke 5:27-32)

¹³ Jesuanhantama wotha Galilee ntjangurna alpuka. Relha ntjarra ekurna worlerrentjalpuka. Era etnanha kaltjinthaka turta.

¹⁴ Kurunga ankerralantama lhapalhamala, Jesuala Levi-anha araka iltha ekuranhanga kathala narlanamanga. Levi era Alphaeus-aka worra naka. Era turta tax money kotjitjata. Erinha aramala, Jesuala erinha ntangkaka, “Nukanga tnaartangala pitjai.” Kamerramala Levi-anha kala Jesuanga tnaartangala lhaka.

¹⁵ Anma, Jesuanha, kurtungurla ekuranha ntjarra turta Levi-aka ilthala worlerraka, marna ilkutjika. Relha kornarintja ntjarra arrpunha, tax money kotjinha arrpunha ntjarra turta, etnala Jesuanga tnaartangala lhamanga, etna turta etnakalela marna ilkurlanakantema.

¹⁶ Artwa Intarrangaltha urrputja, etnala Pharisee turta namanga, etna tanhala nakantema. Etna Jesuanha aramalanga relha kornarintja

ntjarralela marna ilkumanga, relha tax money kotjinha ntjarralela turta, etna Jesuaka kurtungurla ntjarranha pmarraka, “Iwunhangala era relha tax money kotjinha ntjarralela marna ilkuma, relha kornarintja ntjarralela turta?”

¹⁷ Jesuala etnanha wuka. Erantama etnanha ilaka, “Relha ltarrkngalataka itja ngangkaraka yonthama. Relha mentalanta. Yinga pitjika relha kornarintja ntjarranha Altjirurna rretjingitjika, itja relha arratja ntjarranha.”

Relha paka arlta arrpunhala marnakunya nitjika?

(Matthew 9:14-17; Luke 5:33-39)

¹⁸ Arrpunharanga John Kaltjirrpulhelanhelanhaka kurtungurla ntjarra, artwa Pharisee ntjarra turta marnakunya naka. Relha arrpunha ntjarrantama Jesuurna pitjimala erinha pmarraka, “Iwunhangala John Kaltjirrpulhelanhelanhaka kurtungurla ntjarra, artwa Pharisee ntjarra turta marnakunya nama, kanha kurtungurla unkwanganha ntjarra itjala marnakunya nama?”

¹⁹ Jesuala etnanha ilaka, “Artwala noa inamanga, era tjinkarra urrkapuma. Kurunga era tjina ekuranha ntjarranha ntangkama marna ilkutjika. Tjina etnantama yarna marnanga unpulhama, artwa noa inakala, era etnakalela namangantema. ²⁰ Anma pula relha arrpunha ntjarrala artwa erinha errkumala kngitjina. Kurunga artwa ekura tjina ntjarra arlta arrpunhala marnakunyantama nitjina.

²¹ “Arai, thunga mantarra ingkwia tjepakalhama. Relhala itja mantarra

lyartinyanga mantarra kurrka kamala nhanha mantarra ingkwiakarlaka thanthama. Mantarra lyartinya era urlpmerramala, mantarra ingkwia erinha wothantema tjepakakitja.

²² “Relhala turta itja wine lyartinya yinpa ingkwiaka thalama, wine lyartinyala yinpa ingkwia etnanha talhelakitja. Kurunga wine lyartinya era, yinpa ingkwia etna turta, tharrantema ipmintjerrama. Lakinhanganya kunha relhala wine lyartinya kala yinpa lyartinyakanta thalama.”

Sabbath arltiperra

(Matthew 12:1-8; Luke 6:1-5)

²³ Sabbath arlta arrpunhala Jesuanha, kurtungurla ekuranha ntjarra turta, tnukulpanga tjananhaka. Tnukulpa ekurala marna wheat urnma itnaka. Jesuaka kurtungurla ntjarralan-tama marna mpakaka. ²⁴ Artwa Pharisee urrputjalantama Jesuanha pmarraka, “Iwunhangala kurtungurla unkwanganhala marna wheat mpakama, Sabbath arltala? Nhanha kunha itja arratja nama.”

²⁵ Jesuala etnanha ilaka, “Rrangkarra itjala David-aka kaltja? Era nhanga ngaiyala naka, artwa ekuralela namala ntjarra turta. ²⁶ David-anhantama Altjirraka ilthurna irrpuka. Iltha ekurala marna intaka, marna nhanga Altjirranha tjauwerrilya nthakala. Nhanha priestakanta naka ilkutjika. David-ala pula marna nhanha ilkukala, ngaiyalala warta. Era turta marna nhanha artwa ekuralela namala ntjarranha nthaka, ilkutjika. Lakinha David-anha Altjirraka mpaarangarangaka itja kangkwerraka.

Nhanga lakinherraka, Abiathar-anha high priest namalanga.”

²⁷ Jesualantama etnanha ilaka, “Altjirralataka Sabbath arlta erinha ingkairnaka relhaka mar-rakakwia. Era itja relhanha arrpmarnaka, Sabbath arltakakwia. ²⁸ Arai, Relhaka ‘Lira era Sabbath arlta ekura turta Ingkarta nama.”

3

Jesuala artwa iltja ntjirrkakarta marrilaka (Matthew 12:9-14; Luke 6:6-11)

¹ Anma, Jesuanha wotha synagogue-aka ir-puka. Artwa iltja ntjirrkakarta synagogue ekurala naka. ² Relha arrpunha ntjarrantama eterraka, “Era paka artwa nhanhaka iltja marril-amanga, nurna erinha kala ilparnitjinanta kuta.”

³ Jesualantama artwa iltja ntjirrkakarta erinha ntangkaka, “Pitjai!” ⁴ Kurunga era etnanha pmarraka, “Nhanha arratjama nama Sabbath arlala relhaka tangitjala nitjika, relhanha mar-rilitjika turta? Nhanha arratjama nama Sabbath arlala relhanha nakapakarilitjika, kornilitjika paka?” Etna pula pmarna kuta naka.

⁵ Jesuanha etnaka aalerrakantama, Itarrper-raka turta etna arrthata inthorra namanga. Er-antama etnanha ingkarraka tjararaka. Kurunga era artwa erinha ilaka, “Iltja unkwanganha imarnai.” Artwa erantama iltja ekuranha imar-naka. Iltja ekuranha kala marrerraka.

⁶ Artwa Pharisee etnantama synagogue ekuranga rratamala lhaka. Etna turtantama Herod-aka kurtungurla ntjarralela angkarraka, Jesuanha errilknga tutjika.

Relha ntjarra Jesuurna pitjika

⁷ Jesuanha, kurtungurla ekurannya ntjarra turta Galilee ntjangurnantama lhaka. Relha Galilee-arinya ntjarrantama ekururna worler-rentjalpuka. ⁸ Relha arrpunha ntjarrala turta Jesuiperra wuka. Etnantama Judea-anga pitjika, Idumea-anga, Jerusalem-anga, Jordan urntwar-rampinyanga, pmara Tyre Sidon tharranga turta. ⁹ Relha etna ntjarra inthorra naka. Lakinhanganya Jesuala kurtungurla ekurannya ntjarrannya tur-naka, etna boat nyinta ekura kngitjitjika. Eran-tama boat ekura ntjika, worla kngarrala erinnya rrothakitja.

¹⁰ Jesualantama relha ntjarra inthorranha marrilaka. Lakinhanganya relha menta arrpunha ntjarra turta ekururna etinyerraka, erinnya an-putjika. ¹¹ Relha enka kornakarta ntjarrala erinnya aramalanga, etna arnaka iwulhitjata. Enka korna etnantama ilkitjata, “Unta kunha Altjirraka ‘Lira nama.” ¹² Jesuala pula enka korna etnanha rralthamala turnitjata, etna relha ntjarrannya nannya itja ilitjika.

*Jesuala kurtungurla 12 urraraka
(Matthew 10:1-4; Luke 6:12-16)*

¹³ Partaka ntjimala, Jesuanha artwa etnaka ntangkalhaka, etnakala era antja nakala. Etna ekururna pitjika turta. ¹⁴ Kurunga era artwa 12 urraraka. Era etnanha ilaka, “Arai, atha

rrangkarranha urraraka nukalela nitjika, atha turtantama rrangkarranha yairnitjina Yia Marra erinha kaltjinthitjika. ¹⁵ Atha turta rrangkar-ranha ekartilama rrangkarra enka korna ntjarranha relhanga irrpalthala unputjinanga.” ¹⁶ Artwa nhanha etna naka Simon. Erinha Jesuala rretnya Peter turta alpmelaka. ¹⁷ Zebede-aka worra tharra, James-anha, tjia ekura John-anha turta. Artwa nhanha tharranha Jesuala rretnya arrpunha turta alpmelaka, “Boanerges,” nhanhatitja “Kwatja Angkatjaka ‘liranhanga.” ¹⁸ Andrew, Philip, Bartholomew, Matthew, Thomas, James arrpunha nhanga, Alphaeus-aka worra, Thaddaeus, Simon turta. Simon nhanha era thakerritjata Altjirraka mpaarangarangka kangkwerritjika. ¹⁹ Judas Iscariot turta. Judas nhanha era Jesuanha anma leltjaka lanthaka.

Etna ilaka Jesuanha errintjakarta kula namanga

(Matthew 12:22-32; Luke 11:14-23; 12:10)

²⁰ Jesuanha iltha ekuranhurnantama alpuka. Relha ntjarra inthorrantama ekurna wothantema worlerrentjalpuka. Jesuala, kurtungurla ekurannya ntjarrala turtantama yarna marna ilkuka, relha ntjarranga. ²¹ Jesuaka tjinala nanshiperra wumalanga, etna pitjika erinha errkutjika. Etna etarlaraka era kula rirterrakala.

²² Artwa Intarrangaltha urrputjantama Jerusalem-anga pitjika. Etna relha ntjarranha lakinha ilaka, Jesuiperra. “Artwa nhanha Beelzebub-aka kangkwerrama, errintja ntjarraka itornkaka. Beelzebub-ala erinha

ekarltilama, era enka korna ntjarranha relhanga irrpalthala unpurlenitjinanga.”

²³ Jesuanhantama artwa Intarrangaltha ntjar-raka ntangalhaka. Era etnanha ilaka, etnaka yia alpmelamala, “Satan-ala yarna Satan-anha unpurlenama. ²⁴ Etarlarai, relha pmararinya ntjarra leltjakaleltjerramanga, pmara etnaka kala ipmintjerritjina. ²⁵ Ramarama turta, etna leltjakaleltjerramanga, etna kala yirritjinantema. ²⁶ Lakinhangana, Satan-anha paka Satan-aka leltja namanga, era kala yirritjina.

²⁷ “Arai, thunga artwa, artwa ekarltaka ilthurna irrputjika antja, yultha ekuranha nyilkngala initjika. Era artwa ekarlta erinha er-kumala yirnitjikarrka. Kurunganta era yultha ekuranha irrpalthala nyilkngala kngama.

²⁸ “Athantama rrangkarranha nhanha nthur-rpa ilama. Thunga relha korna inthorra ntelalhama, Altjirranha arrampowuma turta. Altjir-rala kala korna ekuranha iwutjina, era ekurna toperramanga. ²⁹ Relhala pula Enka Alkngaltara erinha arrampowumanga, Altjirrala korna ekuranha itja kutala iwutjina. Korna ekuranha kala kuta intitjina.” ³⁰ Jesuala etnanha nhanha ilaka, arrpunhala ilakalanga era kula enka kornakarta namanga.

*Relha etnala Jesuaka mia pa tjia nama
(Matthew 12:46-50; Luke 8:19-21)*

³¹ Jesuaka mia, tjia ekuranha ntjarra turtantama pitjika, kathala turta kaaralhaka. Etnantama Jesuurna angkatja yairnaka era etnakurna rratitjika. ³² Relha etnala Jesualela namanga,

etnantama erinha ilaka, “Arai, mia unkwanga, tjia unkwanganha ntjarra turta unkwanga kathala kaaralhama.”

³³ Jesuala pula etnanha pmarraka, “Ngunhama mia nuka, tjia nuka turta nama?” ³⁴ Relha eku-ranga kaarntakaarntala namala ntjarranhan-tama era ntelamala ilaka, “Rrangkarra mia pa tjia nuka ntjarra nama. ³⁵ Relha etnala Altjirra-ka kangkwerrama, etna kunha tjia nukanha nama, mia nukanha turta.”

4

Yia artwa nyintiperra erala marna annga ingkairnakala

(Matthew 13:1-17; Luke 8:4-10)

¹ Jesuala wothantema relha ntjarran-
ha kaltjinhaka, Galilee ntjanganga kutala.
Relha ntjarra inthorantama ekurna
worlerrentjalpuka. Lakinhangana era boat-aka
ntjimala, kwatjala naka. Kanhana relha ntjarra
ankerralala itnaka. ² Jesualantama etnanha
kaltjinhaka, etnaka yia alpmelamala. Nhangana
lakinhangana ngerrana era etnanha kaltjinhaka.

³ “Wurrirrai. Artwana nyintana tnu-
kulpana lhanana marna annga ingkairnitjika.

⁴ Erantama annga etnanha alpantiwumanga,
annga arrpunhana ntjarra tjaiyakarlaka tnyika.
Thepana ntjarrantama pitjika, annga etnanha
ilkukana turta. ⁵ Annga arrpunhana ntjarra
arnana partapathakarlaka tnyika. Etnana parrpana
lyapuka, arnana era tarrathana wara warana namanga.

⁶ Lirngana era pula rratamalanga, lirngana
marna kurrkana etnanha ntjirrkilamala mpuka.

Takarra etnaka yarna warta arna kwanurna irrpukalanga. ⁷ Kala annga arrpunha ntjarra lyakanga mpopakarlaka tnyika. Lyaka etnantama mangkamala marna kurrka etnanha ulpulatuka. Etnantama itja kuta marnakarterraka. ⁸ Kala annga arrpunha ntjarra pula arna marrakarlakala tnyika. Etna mangkaka, marnakarterraka turta. Arrpunhala annga 30 lhalhelaka. Arrpunhala 60. Arrpunhala 100.”

⁹ Jesualantama etnanha ilaka, “Ungkwanga paka ilpa intamanga, kala wurlathanai.”

¹⁰ Jesuanha kala nyintarinyantama namalanga, kurtungurla ekurana 12, relha urrputja arrpunha turta ekururna pitjika, erinha yia etnakiperra pmarritjika. ¹¹ Jesuala etnanha ilaka, “Yinga antja nama rrangkarra lhangkaritjika Altjirranha kala pitjikala relha ingkarrakaka ntelalhitjika era Ingkarta namanga. Kana relha arrpunha ntjarra, etnala itja worla nukanhala namanga, etnanha atha yiala alpmelama. ¹² Atha etnanha yiala alpmelama,

‘etna yia nukanha wutjinanga, angkatja

arrpunha nukanha turta,

etna pula etnanha itja lhangkaritjinanga.

Arai, etna paka angkatja nukanha nthurra lhangkaramanga,

etna Altjirruna toperrakitja, Altjirrala

turtantama korna etnakanha iwukitja.’ ”

¹³ Jesualantama etnanha pmarraka, “Thunga rrangkarra yia artwa nhangiperra yarna lhangkarama, artwa erala marna annga ingkairnakala. Nthakinantama rrangkarra yia

arrpunha ntjarra lhangkaritjina? ¹⁴ Arai, artwa erala marna annga alpantiwuma, erataka relha lenha ngerra nama, erala Altjirraka angkatja relha ntjarranha kaltjinthama. ¹⁵ Annga nhanga tjaiyakarlaka tnyikala, nhanha kala relha etna ngerra nama, etnala Altjirraka angkatja wuma. Etna pula angkatja erinha wumanga ngerra, Satan-ala angkatja erinha rakama. ¹⁶ Annga nhanga arna partapathakarlaka tnyikala, nhanha kala relha etna ngerra nama, etnala kngarra kangkama etna Altjirraka angkatja wumalanga. ¹⁷ Etna pula angkatja ekura parrpa kngwerrama. Lakinhangana etna Altjirranha itja ekarlta tnakama. Etnantama imampurlerramanga, relha arrpunhala paka etnanha arrampowumanga Altjirraka angkatjakakwia, etna kala Altjirranha impumanta. ¹⁸ Annga nhanga lyaka mpopakarlaka tnyikala, nhanha kala relha lenha ntjarra ngerra nama, etnala Altjirraka angkatja wuma. ¹⁹ Etna pula yulthiperralka, arrkaniperralka money-iperralka kngarra kuta eterramala Altjirraka angkatja parrpartilama. Altjirraka angkatjantama itja kuta anngakarerrama ngerra. ²⁰ Annga nhanga arna marrakarlaka tnyikala, nhanha kala relha lenha ntjarra ngerra nama, etnala Altjirraka angkatja wuma, ekura kuta antja nama turta. Etnantama annga marra lhalhelama ngerra, arrpunhala 30, arrpunhala 60, arrpunhala 100.”

Relha ekurala ilpa intamanga, era kala Altjir-

raka angkatja wutjika
(Luke 8:16-18)

²¹ Jesuala etnanha ilaka, “Relhala kunha itja alkngantha iltha kwanurna kngamala taarnala korltama, bed-anga kwaninyaka paka arrarnama. Era pula alkngantha erinha table-akatitja arrarnama. ²² Arai, lyarta relha ntjarrala Altjirraka angkatja itja lhangkaritjina, angkatja nhangathala etnanha ilamanga. Anma pula Altjirraka angkatja nhanha etnaka nentilitjina. ²³ Ungkwanga ilpa paka intamanga, yinganha wurlathanai.”

²⁴ Era turta etnanha ilaka, “Rrangkarra itja Altjirraka angkatja wara wurlanitjika. Rrangkarra relha arrpunha ntjarranha Altjirraka angkatja kaltjinthamanga, Altjirraka rrangkarra turta kngarralkura kaltjinthitjina. ²⁵ Relha erala Altjirraka angkatjaka kangkama, Altjirraka angkatjaka turta kngarralkura kaltjeritjika antja nama, erinha Altjirraka wothalkura kaltjinthitjina. Kanha relha erala Altjirraka angkatjaka antjakunya, erinha Altjirraka itja kuta kaltjinthitjina.”

Yia marna anngiperra

²⁶ Jesuala etnanha ilaka, “Altjirranha relha ingkarrakaka Ingkarta namanga, lakinha ngerra nama. Artwala marna annga arnaka alpantiwuma. ²⁷ Annga etnanha alpantiwumaliperra, artwa era kunpa ingula ankwentama, kunpa arlatala nthulapuma. Annga etna pula lyapuma, mangkama turta. Nthakinhama annga etna mangkama? Artwa era itja kaltja. ²⁸ Kala

arna erarrpa annga etnanha mangkalhelama. Arrkurla annga etna lyapuma. Kurunga etna mangkama. Kurunga etna anngakarerrama. ²⁹ Anma, annga etna kala urnmerrakalangan-tama, artwa era marna etnanha kotjima.”

Yia tjurrka anngiperra

(Matthew 13:31,32,34,35; Luke 13:18,19)

³⁰ Jesuala etnanha pmarraka, “Nthakinhama relhala lhangkaramara ‘Altjirranha relha ingkar-rakaka Ingkarta namanga?’ Nthakinha turtama atha nhanha rrakangkarra nentilamara? Arai, atha rrakangkarra yia alpmelitjina. ³¹ Nhanha kala nama relhala tjurrka annga arnaka ingkairnamanga ngerra. Tjurrka annga era kala kurrka inthorra nama. ³² Tjurrka annga erinha pula ingkairnamalanga, era kala mangkamala kngarritja inthorrerrama, etintjakarta. Thepa etnantama pitjima, antjwa etnakanha turta etint-jala mpaarama.”

³³ Jesuala relha ntjarranha Altjirraka angkatja kaltjinhaka, etnanha yia arrpunhakarrpunha alpmelamala. Era pula etnanha lenhakurtit-janta kaltjinhaka, etnala irrpalthala kaltjerraka. ³⁴ Era kala etnanha yia alpmelamalanta wara kaltjinhaka. Yiakunya era etnanha itja kuta kaltjinhaka paka. Kanhaha era kurtungurla eku-ranaha ntjarralela namalanga, nhanga etnanta, era etnaka Altjirraka angkatja ingkarraka nen-tilakala.

Jesuala wurinya ekarlta parraka

(Matthew 8:23-27; Luke 8:22-25)

³⁵ Kala ngurrangurrerrakalangantama, arlta nyinta ekurala, Jesuala etnanha ilaka, “Mpa, nurna kala ntjanganga tjananhiai, etapa arpunhurnantama.” ³⁶ Jesua era kala boat-ala naka. Relha worla etnanha impurlalhamalan-tama, kurtungurla ntjarrala Jesuanha kala kn-gaka. Boat arrpunha ntjarra turta etnakalela lhakantema. ³⁷ Etna kunpa lhapalhamanga, wurinya ekarlta inthorralla etnanha twentjika. Kwatja kngarrantama boat ekura thalalhaka, in-marra kngarritja inthorranga. ³⁸ Jesuanha pula boat ingkarna mpinyala ankwentarlana-kala, kartamalala intamala. Kurtungurla ntjar-ralantama erinha kamalhelamala pmarraka, “Kaltjinthanhinthanhai, unta kunpala ankwen-tama nurna ilutjikerramangatanya?”

³⁹ Kamerramala, Jesuala wurinya erinha, in-marra etnanha turta parraka, “Kala yirrai!” Kala wurinya era, inmarra etna turta yirrakanta.

⁴⁰ Jesualantama kurtungurla ekuranha ntjar-ranha pmarraka, “Iwunhangala rrangkarra tr-erraka? Rrangkarra yinganha itjala tnakama?”

⁴¹ Etna pula kala kngarralkuratitja trerraka ar-rkurlangatjina. Etna pmarrarraka, “Ngunhama artwa nhanha? Wurinya, kwatja inmarralka kunha ekura kangkwerrama.”

5

*Yia artwa enka korna ntjarrakartiperra
(Matthew 8:28-34; Luke 8:26-39)*

¹ Ntjanganga tjananhamalantama etna pmara Gerasa-urna pitjika. ² Jesuanha warta

boat-anga tnanpuka, kanha artwa enka kornakarta ekurna arrtjanentjika, wolknga mpopanga. ³ Artwa nhanha erataka pmara ekuranha mpaarakala, relha errilngaka wolknganga mpopala. Relhala turta erinha yarna kuta yirnitjata, chain-alalka paka. ⁴ Relha ntjarrala paka iltja pa ingka ekuranha chain-ala yirnamanga, era chain etnanha kala urltakitjatanta. Relhalantama erinha yarna kuta parraka, era ekarita inthorra namanga. ⁵ Ingula pa arltala era relha errilngaka wolkngala ilkarlaputjata, iltjetala turta kalhitjata.

⁶ Artwa nhanha era Jesuanha ilangakantema araka. Erantama ekurna arrtjanentjika, ekuranga urlarra mparalela turta arrarnalhaka. ⁷ Erantama intarra ilkaka, “Jesuai, Altjirra Kn-garra ekura ‘Lirai, iwukama unta nukurna pitjika? Yinganha Altjiranga urlarra lhelai, unta yinganha itja rrukunthakunthilitjinala.” ⁸ Era lakinha angkaka, Jesuala kala enka korna erinha turnakalanga ekuranga rratitjika.

⁹ Jesualantama erinha pmarraka, “Rretnya ngunhama unta?”

¹⁰ Artwa era erinha ilaka, “Yinga nama rret-nya ‘Ntjarr’, yinga enka korna ntjarrakarta warta namanga.” Erantama Jesuaka kuta ngkangkawulhaka, era itja enka korna etnanha pmara lenhanga unpurlenitjika.

¹¹ Etinya wara, parta ingkala, pig ntjarrala marna ilkurlanaka. ¹² Enka korna etnantama Jesuaka ngkangkawulhaka, “Nurnanha pig ntjarrurna yairnai, nurna etnakurna irrputjinanga.”

¹³ Jesuala kala etnanha impurlarrarnaka. Enka

korna etnantama artwa ekuranga rratomala, pig ntjarrurna irrpuka. Pig worla etnataka 2,000 ngerra naka. Pig etnantama rirterramala parta irnkurna arrtjanamala, kwatja ntjangurna tnyinhaka, alknngontingkaka turta.

¹⁴ Artwa pig ntarntarintja ntjarrantama townurna arrtjanaka, tnukulpa ntjarrurna turta, yia erinha ilarlaputjika. Pmararinya ntjarrantama pitjika, aritjika. ¹⁵ Jesuurna etinyerramala, etna artwa nhanganha araka. Era eterrintja marakartantama naka, mantarraka ekarralhakala turta. Etnantama trerraka. ¹⁶ Kurunga relha etnala nhanha arakala, etna relha pitjikala etnanha yia nhanha ingkarraka alpmelaka. ¹⁷ Relha nhanha etnantama Jesuanha ilaka, "Nurna antja nama unta pmara nurnakanhanga kala rratitjikanta."

¹⁸ Jesuanha kala boat-aka ntjimalangantama, artwa marrerrakala era Jesuanha ilaka, "Yingataka unkwangalela lhitjika antja." ¹⁹ Jesuala pula erinha parraka. Era erinha ilaka, "Tjina unkwanganha ntjarrurna alpai. Etnanha turta ilai Inkartala nganha marrilakala, unkwanga kangkintja ntelalhakala turta."

²⁰ Artwa era kala pmara Decapolis-urna lhaka. Era turta relha ingkarrakanha ilaka Jesuala erinha marrilakala. Relha ntjarrala yia nhanha wumalanga, etna ingkarraka tnolkaka.

*Jesuala Jairus-aka kwarra marrilaka, arrkutja mentanha turta
(Matthew 9:18-26; Luke 8:40-56)*

21 Jesuanhantama wotha ntjanganga tjananhaka, boat-ala. Ntjanga altorlampinyak-erramala, relha ntjarra inthorrantama ekurna worlerrentjalpuka. 22 Jairus, synagogue lenharinyaka itornka, era turta pitjikantema. Jesuanha aramala, era ekuranga urlarra mparalela arrarnalhaka. 23 Erantama ingkaka, "Jesuai, kwarra nukataka kala ilutjikerrama. Nukalela pitjai iltja unkwanganha ekurakarlaka arrarnitjika era wotha marreritjinanga." 24 Jesuanha kala Jairus-alela lhaka. Worla kngarra turta ekuralela lhakantema. Etna lhapalhamalanga, relha ntjarrala erinha parlpapauwurlapuka, ekurna etinyerritikerramala.

25 Arrkutja nyinta worla lenhala nakantema, erala 12 years menta kngarrakarta nakala. 26 Era kala ngangkara ntjarrurna lhakala, etna pula erinha yarna marrilaka. Erantama kala money-akunya naka, money ekuranha ingkar-raka ngangkara ntjarranha nthakala. Erarra pula mentalkurala naka.

27 Arrkutja nhanhala kala arrkurlantema wukala Jesuala menta ntjarranha marrilamanga. Erantama Jesurna etinyerraka, mantarra tjenja ekuranha anpuka turta. 28 Erataka lak-inha eterraka, "Atha paka mantarra ekuranhanta anpumanga, yinga kala marreritjina." 29 Erantama mantarra tjenja ekuranha anpumanga ngerra, era marrerralalhaka. Era turta wulhaka mpurrka ekura kala marrantama namanga.

³⁰ Era warta Jesuaka mantarra anpuka, kanha Jesuanha wulhalalhaka era kurrka thaltjerramanga. Erantama relha ntjarranha pmarraka, “Ngunhalama mantarra nukanha anpuka?”

³¹ Kurtungurla ekurannya ntjarrala pula erinha ilaka, “Iwunhangala unta pmarrama, ‘Ngunhalama mantarra nukanha anpuka?’ Unta yarnala arama relha ntjarra unkwanganga etinya itnamanga, nganha parlpapauwumanga turta?” ³² Jesuanha pula ilkngralhamala relha ekura kuta yonthaka.

³³ Arrkutja nhanga kaltja naka era marrerakala, era nhanga wulhalalhakanga warta. Erantama ekururna pitjika, kngarra trerramala. Mparalela arrarnalhamala, era ilalhaka.

³⁴ Jesuala erinha ilaka, “Kwarra nukai, unta yinganha tnakakalanga Altjirrala nganha kala marrilaka. Kala tnoatnoa alpai.”

³⁵ Jesuanha arrkutja ekururna angkamalangantema, urrpia Jairus-aka pmaranga pitjika. Etna Jairus-anha ilaka, “Kwarra unkwanga kunha kala itja wotha. Itornka erinha kala impai erarrpa lhitjika.”

³⁶ Jesuanha pula angkatja nhandhaka itja kangkwerraka. Era Jairus-anha ilaka, “Itja trerrai. Kala yinganha tnakantai.”

³⁷ Relha arrpunha ntjarranha parramalan-tama, era Peter-anha, James-anha, tjia ekura John-anha turta urraramala, etnakakartantantama Jairus-aka ilthurna anparerraka. ³⁸ Jairus-aka ilthakerramala, Jesuala araka relha ntjarra itnimanga, nthorrkngerramanga turta.

³⁹ Irrpunhamala era etnanha pmarraka, “Iwunhangala rrankarra itnima, nthorrkngerrama turta? Katjia nhanha itjama errilknga. Era wara ankwentama.” ⁴⁰ Etna pula ekura tharrakala.

Jesualantama etnanha ingkarraka ilthanga unpurlenaka. Kurunga katjia ekura kaartu pa miakarta, kurtungurla tharraminyinta ekuranhakarta turta, era room ekururna irrpunhaka, ekuralala katjia era intamanga. ⁴¹ Katjia erinhantama iltjanga errkumala, era erinha ilaka, “Talitha koum!” Nhanhatitja, “Kwarra kurrkai, atha nganha ilama, kamerrai!” ⁴² Kwarra era kala kamerrakanta, ingka nthulapuka turta. Kwarra era 12 years ingkwia naka.

Nhanha aramala etna ingkarraka tnokekanta, yarna inthorra etarlaritjikerramala. ⁴³ Jesuala pula etnanha angkatja ekarlatala tjatjatuka, etna itja relha arrpunhanha nanshiperra ilitjika. Erantama kaartu pa mianha ilaka eratharra kwarra erinha marna ilkutjika nthitjika.

6

Relha Nazareth-arinya ntjarra Jesuaka antjakunyerraka

(Matthew 13:53-58; Luke 4:16-30)

¹ Pmara lenha impurlalhamalantama, Jesuanha pmara ekuranhurna alpuka. Kurtungurla ekuranha ntjarra ekuranga tnaartangala lhakantema. ² Sabbath arltalantama, era relha ntjarranha synagogue-ala kaltjinhaka. Etna erinha wumalanga etna tnokekanta, pmarrarraka

turta. “Nthanhalama era angkatja nhanha ar-kurla wuka? Nthakinhama era kaltja inthor-rerraka? Ngunhala turtama erinha ekarltilaka tjatjikarta urrkaputjika? ³ Arai, Jesua nhanha era kunha rurlaka urrkapunhapunha. Nurna Mary-aka, mia ekuranhaka kaltja, tjia ekuranha ntjarraka turta, James-aka, Joses-aka, Judas-aka, Simon-aka turta. Arrumpa ekuranha nt-jarra turta pmara nanhala namantema, nur-nakalela.” Relha etnantama Jesuaka antjakun-yerraka.

⁴ Jesualantama etnanha ilaka, “Relha arrpunha ntjarralanta kunha kaltjinthanhinhanha kngarranha tnantjama. Kanha relha pmararinyala, ramarama ekuranhala, tjina ekuranhala turta, erinha itja kutala tnantjama.” ⁵ Erantama pmara lenhala yarna tjatjikarta kngarra urrkapuka. Era kala relha urrputjanhanta wara marrilaka, iltja ekuranha kapurta etnakanhaka arrarnamala. ⁶ Jesuanhataka tnolkaka etna erinha itja kuta tnakamanga.

Jesuanha town kurrka nyintaminyinturnan-tama lhaka, era turta relha town-arinya etnanha kaltjinthaka.

Jesuala kurtungurla 12 etnanha yairnaka, relha ntjarranha kaltjinthitjika

(Matthew 10:5-15; Luke 9:1-6)

⁷ Kurunga 12 etnanha ntangkamala, era etnanha urrpia yairnaka, tharra pmara nanhurna, tharra pmara arrpunhurna, tharramatharra eknga. Era etnanha ekarltilaka turta enka

korna ntjarranha relhanga unputjika. ⁸ Era etnanha lakinha turta tjatjatuka. “Rrangkarra kala erratitjakartanta lhitjika. Rrangkarra turta itja marna kngitjika, thauwa paka, money paka. ⁹ Rrangkarra kala sandal-aka ekarralhitjika. Rrangkarra pula itja coat tharra kngitjika. ¹⁰ Rrangkarra town-urna irrpumalanga, relha etna turta rrakangkarra antja namanga, kala iltha nyintala kuterrai rrangkarra anparerritjinalpula. ¹¹ Thunga pula rrangkarra town-urna irrpuma. Relha etna rrakangkarra antjakunya nama. Etna turta itja antja nama rrankarranha wutjika. Kala town lenhanga rratai, urlpmurra ingka rrakangkarranhanga ilarnamala. Lakinha rrangkarra etnanha lhalaritjina, Altjirurna toperritjika.”

¹² Kurtungurla etnantama lhaka, relha ntjarra ilaka turta etna Altjirurna toperritjika. ¹³ Etna enka korna ntjarranha relhanga unpuka. Etna turta relha menta ntjarranha ntirala parnamala, marrilaka turta.

Herod-ala John Kaltjirrpulhelanhelanhaha errilknga tuka

(Matthew 14:1-12; Luke 9:7-9)

¹⁴ Kala relha ntjarra inthorralantama Jesuiperra wuka. King Herod era turtantama ekuriperra wukantema. Relha arrpunha ntjarra lakinha Jesuiperra angkaka, “John Kaltjirrpulhelanhelanhaha wotha etatherrakau. Altjirrala turta erinha ekartilaka tjatjikarta urrkaputjika.” ¹⁵ Arrpunha ntjarra pula angkaka, Elijah-anha kula wotha etatherrakala. Kanha arrpunha

ntjarra angkaka Jesuanha kula Altjirra urrpia imankinya arrpunhala namanga. ¹⁶ Herod-ala pula Jesuiperra wumala, lakinhala angkaka, “Nhanha John-anhanta kuta nama. Atha nhanga tjapartia nyintanha turnaka kapurta ekuranha inturnitjika. Erantama lyarta wotha etather-rakala nama.”

¹⁷⁻¹⁸ King Herod-alataka Herodias-anha, tjia ekuranha Philip-aka noa, noa inakala. John-alantama erinha tjatjatukala, “Nhanha itja ar-ratja nama unta tjia unkwanganhaka noa tnyinitjika.” Angkatja nanhakakwiantama King Herod-ala tjapartia ekuranha ntjarranha turnaka John-anha errkutjika, erinha chain-ala yir-nitjika, jail-aka turta kurnitjika.

¹⁹ Herodias erataka John-aka yirrknga inthorra naka. Era turta antja naka erinha errilknga tutjika. Era pula erinha yarna errilknga tuka, Herod-ala erinha ntarntaramanga.

²⁰ Herod-anhataka John-anga trerraka, era kaltja nakalanga John-anha artwa arratja, marra turta namanga. Herod-anha John-aka wothamawotha ntangkalhitjata erinha wutjika. John-aka angkatjala erinha rwampiilitjata, era pula kalantema ekura wotha ntangkalhitjata, erinha wutjika.

²¹ Herodias era pula kuta antja naka John-anha errilknga tutjika. Kurunga lakinhantama naka. Herod-ala tjinkarra urrkapuka, alkngeerrintjika arlta ekuranhaka ilpangkitjika. Era turta pmara Galilee-aka itornka ntjarra ntangkaka ekuralela tjinkarra ilkutjika. ²² Etna tjinkarra ilku-malanga, Herodias-aka kwarra pitjimala etnaka

nthaperraka. Era etnanha kngarra arrkanilaka turta. Lakinhangha Herod-ala erinha pmarraka, “Iwunhakama unta antja? Kala nuka enkai.”
²³ Altjirraka rretnyala era erinha lhelaka, “Unta paka pmara nukanhaka karta arrpunhaka antja namanga, atha nganha nhanha kala nthitjina.”

²⁴ Kwarra erantama rratamala mia ekuranhurna lhaka, erinha pmarraka turta, “Iwunhakama yinga Herod-aka enkitjika?”

Mia ekurala erinha ilaka, “Herod-aka enkai John Kaltjirrpulhelanhelanhaka kapurtaka.”

²⁵ Kwarra era parrpa Herod-urna alpuka, erinha ilaka turta, “Yinga antja nama unta yinganha lyarta nhanha John Kaltjirrpulhelanhelanhaka kapurta nthitjika, taarnaka arrarnakala.”

²⁶ Nhanha wumala, Herod-anha porerraka. Era pula kwarra ekura kangkwerraka, era erinha itornka ntjarranga alkngatharra lhelakalanga.

²⁷ Lakinhangha era kala tjapartia nyinta yairnaka John Kaltjirrpulhelanhelanhaka kapurta inturnamala, kngitjalputjika. Artwa nhanha era jail-urna lhamala, era kala John Kaltjirrpulhelanhelanhaka kapurta inturnaka. ²⁸ Erantama kapurta erinha taarnaka arrarnamala kngitjalpuka, nhanha kwarra erinha turta nthaka. Kwarra erantama nhanha mia ekuranha nthaka.

²⁹ John-aka kurtungurla ntjarrala nhanhiperra wumalanga, etna lhamala John-aka mpurrka inarlalpuka, nhanha wolkgaka turta kurnaka.

*Jesuala artwa 5,000 ntuthilaka
 (Matthew 14:13-21; Luke 9:10-17; John 6:1-14)*

³⁰ Apostle etna Jesuurna pitjalpukantama. Kurunga etna erinha ilaka, "Nurna kunha relha ntjarranha kaltjinhaka, nurna turta tjatjikarta urrkapuka untala nurnanha turnakala ngerra."

³¹ Relha ntjarrala pula Jesuanha, kurtungurla ekuranha ntjarranha turta, porrkaporrka inthorilaka. Jesua etnantama marnalka yarna ilkuka. Lakinhanganga Jesuala kurtungurla ekuranha ntjarranha ilaka, "Mpa nurna worritjurna lhiai, kurka iltjerramala nitjika." ³² Boat-aka ntjimala, etna kala kwatjanga tjananhaka worritjurna. Etna itja relha nyintanha ilaka etna worritjurna lhamanga. ³³ Relha lenha ntjarra pula, etnala etnanha lhamanga arakala, etna kala pmara erinha etarlaraka. Etnantama pmara ekururna arerraka. Etnakimparra turta pmara ekura eritjalhaka.

³⁴ Boat-anga tnanpumala Jesuala worla kngarra etnanha araka. Etna sheep ntjarra ngerra naka, tnairnarintjakunya. Erantama etnaka konyerraka, etnanha kaltjinhaka turta.

³⁵ Kala ngurrangurrerrakalangantama, kurtungurla ekuranha ntjarra Jesuurna pitjimala erinha ilaka, "Arai, pmara nhanhataka worritja, relhakunya." ³⁶ Lakinhanganga unta relha ntjarranha kala yairnarlenai, town kurrka ntjarrurna lhitjika, marna initjika."

³⁷ Jesuala pula kurtungurla etnanha ilaka, "Rrangkarratitja etnanha marna ilkutjika nthai."

Etnantama erinha pmarraka, "Unta antja nama nurna marna kngarra inthorra buyemilitjika, relha nhanha ntjarranha ntuthilitjika? Nurnaka pula money kurrka inthorranta."

³⁸ Jesuala etnanhantama pmarraka, “Marna nthakintjama rrakangkarra intama? Aritjika lhai.”

Aramaliperra etna erinha ilaka, “Marna 5, irrpangga tharra turta.” ³⁹ Jesualantama kurtungurla ekuranha ntjarranha ilaka, “Relha etnanha turnai worlamaworla tharrkakarlaka arrarnalhitjika. ⁴⁰ Relha etnantama worlamaworla arrarnalhaka. Worla arrpunha ntjarra relha 100-akarta naka, kanha worla arrpunha ntjarra relha 50-akarta.

⁴¹ Jesualantama marna 5 etnanha, irrpangga tharranha turta inaka. Alkirurnathaka irnaramala, era Altjirranha dangkilaka. Kurunga era marna etnanha urltakaka. Erantama unkwaltja etnanha kurtungurla ntjarranha nthetnaka relha ntjarraka errarnpalhelitjika. Irippangga tharranha turta era urltakamala errarnpalhelaka.

⁴² Kala relha ingkarraka inthorralla ilkuka. Itja nyinta paka ngaiyala naka. ⁴³ Ingkarna etna 12 basket lyulpalyulpilaka, marna pa irrpangga unkwaltja etnanha kotjimala.

⁴⁴ Arlta lenha ekurala artwa 5,000-ala marna ilkuka.

*Jesuanha kwatja kartninyala ingka lhaka
(Matthew 14:22-33; John 6:15-21)*

⁴⁵ Jesualantama kurtungurla ekuranha ntjarranha turnaka etnakimparra boat-aka ntjitjika, ntjanganga tjananhitjika turta, pmara Bethsaidurna. Era pula kuterraka, relha etnanha pmarurnarrka yairnarlenitjika. ⁴⁶ Era relha etnanha kala yairnarlenakalangantama, Jesuanha partaka ntjika, Altjirruna ingkitjika.

⁴⁷ Kala ngurrangurrerrakalangantama, Jesuanha nyintarinnya naka partala, kanha kurtungurla ntjarra boat-alala naka, ntjanga mpopala.

⁴⁸ Jesuala araka etna nakapakarlerramanga, wurinya ekarlatala etnanha urlarranga twentjimanga. Kala ingutnhalantama, itjantema par-tjerrakalanga pula, Jesuanha etnakurna lhaka, kwatja kartninyala ingka lhamala. Era turta kala anpara lhitjikerraka.

⁴⁹ Kurtungurla ntjarrala erinha aramalanga, kwatja kartninyala urlarrathaka ingka pitjimanga, etna etarlaraka lthana kula pitjimanga. Etnantama ilkarlalhaka. ⁵⁰ Etna ingkarrakala erinha araka. Etna ingkarraka trerraka turta. Jesuanha parrpa etnakurna angkaka, "Palkala thakerritjala. Yingiai." ⁵¹ Jesuanhantama boat-aka ntjika, etnakalela nitjika. Wurinya ekarlta era turtantama yirra. Kurtungurla ntjarra pula tnolkaka, yarna turta eteritjikerraka. ⁵² Etnataka marntilparla wara naka, etna nhanga tjatjikarta marniperra itja lhangkarakalanga warta.

*Jesuala relha menta ntjarranha marrilaka,
Gennesaret-ala
(Matthew 14:34-36)*

⁵³ Ntjanga ekuranga tjananhamala, Jesuanha, kurtungurla ekuranha ntjarra turta, pmara Gennesaret-aka erritjalhaka. Etnantama boat erinha irnakarlaka yirnaka. ⁵⁴ Etna boat ekuranga tnanpumalanga, relha ntjarrala Jesuanha lhangkaraka. ⁵⁵ Relha nhanha etnantama parrpa pmara etnakanhurna arrtjanaka, relha menta ntjarranha turta Jesuurna kngitjika.

Etna menta etnanha ntjamala intamala kuta kngitjika. Jesuanha paka pmara arrpunhurna lhamanga, etna kala menta etnanha pmara lenhurnantama kngaka. ⁵⁶ Jesuanha paka town kurrkurna, town kngarrakngarrurna, town-anga kathurna paka lhamanga, relha ntjarrala relha menta etnakanha ekururna kngitjikan-tema. Menta etnantama Jesuurna ingkaka, “Nurnanha impurlarrarnai mantarra unkwanganha anputjika.” Relha menta etnala mantarra eku-ranha anpuka, etna kala marrerraka.

7

Kngarripataka mpaarangarangiperra (Matthew 15:1-9)

¹ Kurunga artwa Pharisee urrputja, artwa Intarrangaltha urrputja turta Jesuurna pitjika, Jerusalem-anga. ² Etna araka Jesuaka kurtungurla arrpunha ntjarrala marna ilkumanga. Etna turta araka etna itja iltja ilknghilhakalarrka, Moses-ala turnakala ngerra.

³ Arai, artwa Pharisee ntjarrala, relha Jew ingkarrakala turta, iltja etnakanha ilknghilhamalanta marna ilkutjata. Nhanha kunha kngarripata etnakanhaka mpaarangaranga naka. ⁴ Etna marna shop-anga buy-emilakalanga, etna ilknghilhitjatantema, marna erinha ilkutjinala. Etna turta tjampitalka etnakanha kutatha ilknghitjatantema.

⁵ Artwa Pharisee ntjarrala, artwa Intarrangaltha ntjarrala turtantama Jesuanha pmarraka,

“Iwunhangala kurtungurla unkwanganha ntjarrala marna ilkuma, iltja ilknghitjikanha? Iwunhanga turtama etna kngarripata ntjarraka mpaarangarangka itja kangkwerrama?”

⁶ Jesuala etnanha ilaka, “Pmatha ntjarrai, rrankangkarriperra inthorrataka Altjirranha nhangha Isaiiah-arlarlanga angkaka, ‘Relha nhanha ntjarrala yinganha tnantjama angkatja etnakanhala, etna pula nuka itja kangkwerrama.

⁷ Etna nuka urrkurrkintja namalanga, etna orrtjerrama wara.

Etna itja relha arrpunha ntjarranaha turnintja nukanha kaltjinhama, relhaka mpaarangaranganta wara pula.’

⁸ “Rrangkarra Altjirraaka turnintjaka itja kangkwerrama. Relhaka mpaarangarangka pula rrankarra kangkwerramala.” ⁹ Jesuala etnanha nhanha turta ilaka. “Rrangkarra kunha Altjirraaka turnintja ipmintja impuma, relhaka mpaarangarangka kangkwerritjinala. ¹⁰ Arai, Moses-arlarlanga Altjirrala rrankarranaha turnaka, ‘Unta kaarta pa mia unkwanganhaka kangkwerritjika’. Nhanha turta, ‘Relha erala kaarta ekuranha, mia ekuranha paka ar-rampowumanga, erinha rrankarra errilknga tutjika.’ ¹¹ Kanhaha rrankarra relha ntjarranaha lakinhalaha ilama. Thunga relhala kaarta pa mia ekuranha ilama, ‘Arai, marna, yulthalka nhanha ‘Corban’ nama. [Nhanhatitja, atha nhanha Altjirranaha lhelakala.] ¹² Kurunga rrankarra relha erinha ilama nhanha kala marra namanga. Lakinha rrankarra erinha parrama kaarta pa

mia ekuranhaka tangitjala nitjika. ¹³ Lakinha rrankarra Altjirraka turnintja ipmintja impuma, relhaka mpaarangarangka kangkwer-ritjinala. Altjirraka turnintja arrpunha ntjarra turta rrankarra lakinhantema ipmintja impuma.”

Angkatja kornala relhanha kornilama, itja marnalalka
(*Matthew 15:10-20*)

¹⁴ Jesualantama relha ntjarranha wotha worlilaka. Era etnanha ilaka, “Nhanha wai, lhangkarai turta. ¹⁵⁻¹⁶ Relhala marnalka rrakartala ilkuma. Marnalalka pula relhanha yarna Altjirranga urlarra kornilama. Angkatja korna etnala relhaka rrakartanga rratama, etnataka relhanha Altjirranga urlarra kornilama.”

¹⁷ Jesuanha, kurtungurla ekuranha ntjarra turta kala ilthakantama irrpukalanga, relha worla etnanha impurlalhamala, kurtungurla ntjarrala Jesuanha pmarraka, “Nurnaka nentilai yia untala lyarta ilakala.”

¹⁸ Erantama etnanha pmarraka, “Yai, rrankarrenpama marntilparla? Etarlarai, marna rrankarrala ilkuma, marna nhanhala rrankarranha yarna Altjirranga urlarra kornilama. ¹⁹ Marna nhanha itja etarlingetarlurna irrpuma, tnarturna pula. Kurunga nhanha kala mpurrkanga rratamantama.” Lakinha angkamala Jesuala antja naka etnanha ilitjika marna ingkarraka marra namanga ilkutjika.

²⁰ “Arai,” Jesuala etnanha ilaka, “Angkatja pula relhaka eterrintjangala rratama. Angkatja korna etnantama relhanha Altjirranga urlarra kornilama. ²¹ Relha kunha paala eterrama. Paala eterramalantama era ntaiyawuma, nyilkngala inama, errilknga tuma, ²² arrpunhaka noalela intama, yulthaka kngarra lherrama, ekuriltja eterrama, orrtjerrama, kerrintjakunya nama, iltama, arrampowuma, tjurnalhama, rirtarirta turta ntelalhama. ²³ Lherrintja korna ingkarrakataka relhaka eterrintjanga rratama. Etnantama relhanha Altjirranga urlarra kornilama.”

*Arrkutja Phoenicia-arinya nyintala Jesuanha ekarlta tnakaka
(Matthew 15:21-28)*

²⁴ Pmara lenhanga, Jesuanha pmara Tyre-anga kuturnantama lhaka. Erantama iltha nyintaka irrpuka, relha ntjarranga lauwulhamala. Era pula yarna kuta lauwulhaka. ²⁵ Arrkutja nyinta, kwarra ekurala enka kornakarta nakala, era wuka Jesuanha pitjikala. Era parrpa inthorra Jesuurna lhaka, ekuranga urlarra mparalela ar-rarnalhaka turta. ²⁶ Arrkutja nhanha era Greece-arinya naka, pmara Phoenicia-ala alknngerrakala. Phoenicia erataka pmara Syria-ala naka. Arrkutja erantama Jesuurna ingkaka era enka korna erinha kwarra ekuranhanga unputjika. ²⁷ Jesuala pula erinha ilaka, “Nukathaka nama katjia ntjarranhakimparra marnala ntuthilitjika. Nhanha itjama arratja namara katjiaka marna kngulya ntjarranha nthitjika.”

²⁸ Arrkutja era pula erinha ilaka, “Ingartai, unta kala arratja angkama. Kngulya etna pula unkwaltja etnanha ilkumantemala, unkwaltja nhanga katjialala ipmintja impuka.”

²⁹ Jesualantama erinha ilaka, “Unta kunha arratja angkaka. Kala alpai. Enka korna era kala kwarra unkwanganhanga rrataka.”

³⁰ Alpumala, era kwarra ekuranha aritjalhaka kunpa ntjamala intamanga. Enka korna era kala ekuranga lhakala.

Jesuala artwa nyintanha marrilaka, erala rirta nakala, era turtala yarna angkakala

³¹ Jesuanha Tyre ekuranga wotha anparerraka. Erantama Sidon-anga, pmara Decapolis-anga turta tjananhamala, Galilee-urna pitjika.

³² Pmararinya ntjarralantama artwa nyinta ekurnurna kngitjika. Artwa era rirta naka, yarna turta angkaka. Etnantama Jesuurna ingkaka era iltja ekuranha ekurakarlaka arrarnitjika.

³³ Jesualantama artwa erinha worlanga rratalhelaka, eratharrarpa nitjinanga. Kurunga era iltja kantja ekuranha ilpa ekuranhaka kurnaka. Era palha turta iwumala, nhanha artwa ekura linyaka arrarnaka. ³⁴ Alkirurnathaka irnaramalantama, Jesuala artwa erinha mpangkamala ilaka, “Ephphatha,” nhanhatitja, “Altjurerrai.” ³⁵ Artwa erantama kala irrpalthala wuka, angkaka turta.

³⁶ Jesualantama relha ntjarranha turnaka, etna itja inthorra relha arrpunha ntjarranha nahanhiperra alpmelitjika. Etna pula ekura itja kuta kangkwerraka. Era warta etnanha parralanaka,

kanha etna yia erinha arrpunha ntjarranha wothamawotha alpmelaka. ³⁷ Relha etnataka Jesuiperra kngarra tnolkaka. Etnantama ilaraka, “Era kunha tjatjikarta urrkapumala, relhaka tangitjala nama. Era relha rirtanha, relha angkitjikanhanha turta marrilama.”

8

Jesuala relha 4,000 ngerra ntuthilaka (Matthew 15:32-39)

¹ Arrpunharanga, relha ntjarra wothantema Jesuurna worlerrentjalpuka. Marna etnaka kala yirrakalangantama, Jesuanha kurtungurla eku-ranhanha ntjarraka ntangkalhaka, etnanhanha ilaka turta. ² “Arai, yingataka relha nhanhanha ntjarraka konyerrama. Etna kala arlta tharaminintantama nukalela nakala, marnakunya. ³ Atha paka etnanhanha lyarta ngaiyala pmarurna yairnarlapumanga, etna tjaiyala nakapakarler-ritjina. Arrpunhanha ntjarra kunhanha pmara ilan-ganga pitjikala.”

⁴ Kurtungurla ekuranhanha ntjarrala pula erinha ilaka, “Pmara nhanhataka worritja. Nthanhalama nurna marna arltaramara relhanhanha ntjarranha ntuthilitjika?”

⁵ Erantama etnanhanha pmarraka, “Marna nthak-intjama rrakangkarra intama?” Etna angkaka, “Marna kurrka 7.”

⁶ Jesualantama relhanha worla etnanhanha tur-naka arnaka arrarnalhitjika. Kurunga era marna 7 etnanhanha inamala, Altjirranhanha dangki-laka. Kurunga marna etnanhanha urltakamala, era

marna unkwaltja etnanha kurtungurla ntjar-ranha nthaka, relha ntjarraka errarnpalhelitjika. ⁷ Etnaka irrpannga urrputja turta intaka. Eran-tama Altjirranha irrpannga etnaka dangkilaka, etnanha turta kurtungurla ntjarranha nthaka er-rarnpalhelitjika. ⁸ Relha ntjarralantama marna pa irrpannga ilkuka, nhalkerraka turta. In-gkarna etna 7 basket lyulpalyulpilaka, marna nhanga ipmintjerrakala kotjimala. ⁹ Relha etnala marna ilkukala etna kala 4,000 ngerra naka.

Jesuala relha etnanha kala pmarurnantama yairnarlenaka. ¹⁰ Kurunga era boat-aka kala ntji-lalhakanta, kurtungurla ekuranha ntjarrakarta. Ntjanga ekuranga tjananhamala, era kala pmara Dalmanutha-aka erritjalhaka.

Artwa Pharisee ntjarrala Jesuanha ilaka, "Nurnaka tjatjikarta ntelai"

¹¹ Artwa Pharisee ntjarrantama pitjika Je-sualela iwurritjika. Etnantama erinha ar-rkarnamala ilaka, "Tjatjikarta alkirarinya nur-naka ntelai." ¹² Jesuanha mpangkaka. Er-antama etnanha pmarraka, "Iwunhangama rrangkarra yinganha kutatha ilama rrangkar-ranha tjatjikarta ntelitjika? Atha rrangkarranha nhanha nthurra ilama, atha rrangkarranha itja kuta tjatjikarta ntelitjina." ¹³ Erantama etnanha impurlalhaka. Wotha boat-aka ntjimala, era ntjanganga tjananhaka turta.

Jesuala kurtungurla ekuranha ntjarranha tur-naka, etna aralhitjika angkatja nhanga artwa Pharisee ntjarralala kaltjinthamanga

¹⁴ Boat-aka ntjitjinala, kurtungurla ntjarrataka marna arrpunhaka kngwerralalhaka. Lakin-hanga etna marna nyintakartanta boat-aka ntjilalhaka. ¹⁵ Etna lhapalhamalangantama, Jesu-ala etnanha lhalaramala ilaka, “Rrangkarrataka artwa Pharisee ntjarraka, Herod-aka marna ltorlpilanhanga turta aralhitjika.”

¹⁶ Kurtungurla ntjarrantama nhanhiperra angkarraka, lakinha ilarramala, “Erataka nurnanha lakinha ilaka, nurna marna arrpunhaka kngwerrakalanga.”

¹⁷ Jesuanha kala kaltja naka angkatja etnala angkarramalaka. Erantama etnanha pmarraka, “Iwunhangala rrangkarra marniperra angkarrama? Rrangkarra itjantema angkatja nukanha lhangkarama? Rrangkarra marntilparla kutakwa? ¹⁸ Rrangkarra kunha alkngakarta. Iwunhangantama rrangkarra yarna arama? Rrangkarra kunha ilpakarta? Iwunhangantama rrangkarra yarna wuma? Rrangkarra marna nhangiperra kngwerrakama? ¹⁹ Basket nthakintjama rrangkarra marna unkwaltjakarta lyulpalyulpilaka, atha nhanga artwa 5,000 ntuthilamanga marna 5-ala?”

Etna erinha ilaka, “12 kunha.”

²⁰ Jesuala etnanha wotha pmarraka, “Basket nthakintjama rrangkarra marna unkwaltjakarta lyulpalyulpilaka, atha nhanga relha 4,000 ntuthilamanga marna 7-ala?”

Etna erinha ilaka, “7 kunha.”

²¹ Erantama etnanha pmarraka, “Iwunhiper-rama yinga angkama? Rrangkarra itjan-

tema angkatja nukanha marna ltorlpilanhhiperra lhangkarama?"

Jesuala artwa pangaka alknga marrilaka, pmara Bethsaida-ala

²² Jesuanha, kurtungurla ekuranha ntjarra turtantama Bethsaida-urna pitjika. Pmararinya ntjarralantama artwa panga nyintanha Jesuurna kngitjika. Etna Jesuurna ingkaka turta era artwa panga erinha anputjika. ²³ Artwa erinha iltjanga errkumala, Jesuala erinha town-anga kathurna rretjingaka. Erantama alknga ekuranhaka palha iwuka. Iltja ekuranhantama ekurakarlaka arrarnamala, era artwa panga erinha pmarraka, "Unta paka aramama?"

²⁴ Kapurta kartnerramala artwa era angkaka, "Atha relha ntjarranha arama, errkaiyerrkaiya wara pula."

²⁵ Jesualantama wothantema iltja ekuranha alknga ekuranhaka arrarnaka. Alknga ekuranha kala marrerrakantama, era turta kala kathantama araka. ²⁶ Jesualantama erinha ilaka, "Kala iltha unkwanganhurna alpai. Unta pula itja town-urna lhitjika."

Peter-ala ilaka Jesuanha Krista era namanga

²⁷ Jesuanha, kurtungurla ekuranha ntjarra turtantama town kurrka ntjarrurna anpara lhaka, town nhanga etnala pmara Caesarea Philippi-anga etinya namanga. Etna nhanga lhapalhamanga Jesuala kurtungurla ekuranha ntjarra-nya pmarraka, "Ngunhama relha ntjarrala ilama yinga kula namanga?"

28 Kurtungurla etna erinha alpmelaka, “Arrpunha ntjarrala ilama unta kula John Kaltjir-rpulhelanhelannya namanga. Arrpunha ntjarrala ilama Elijah. Kanna arrpunha ntjarrala ilama Altjirra urrupia arrpunhala.”

29 Jesuala etnanha wotha pmarraka, “Kanna rrankarraloo? Rrankarra nukiperra nthakinhalata etarlarama? Ngunha inthorrama yinga nama?”

Peter-ala erinha alpmelaka, “Unta nama Krista era.”

30 Jesualantama etnanha tjatjatuka, etna itja inthorra relha arrpunhanha ilitjika era Krista era namanga.

*Jesuala kurtungurla ekurannya ntjarrannya ilaka era anma nyingalauwutjinala
(Matthew 16:21-28; Luke 9:22-27)*

31 Kurunga Jesuala kurtungurla ekurannya ntjarrannya kaltjinhaka, nannya Relhaka ‘Lirakathaka namanga nyingalauwutjika. Era etnanha kaltjinhaka kngarripata ntjarra, priest-aka itornka ntjarra, artwa Intarrangaltha ntjarra turta ekura antjakunyerritjinala, etna turta erinha errilknga tutjinala. Era etnanha kaltjinhaka turta era arlta tharraminyinta errilknga intamaliperra, wotha etatha kameritjinala. 32 Era etnanha nannya ingkarraka katha inthorra kaltjinhaka.

Peter-alantama Jesuanha etapurna rretjingamala, rralthaka. 33 Ilkngaralhamala, kurtungurla

arrpunha ntjarrala turta erinha wutjinanga, Jesuala Peter-anhatitjantama rralthaka. Era erinha ilaka, “Nukanga lhai, Satan-ai. Unta kunha itja Altjirra ngerra eterrama, relha ngerra pula.”

³⁴ Kurunga Jesuala relha worla etnanha, kurtungurla ekurannya ntjarrannya turta ntangkaka, ekururna etinyerritjika. Erantama etnanha ilaka, “Thunga relha antja nama nukanga tnaartangala pitjitjika. Nthakinstantama era ntelalhitjika? Era itja wotha eterrintja ekuranhaka kangkwerritjika. Era pula ntolka ekurannya tjurnamala kngitjika, athala ntolka nukannya kngamanga ngerra. Kurunga era nukanga tnaartangala pitjitjika. ³⁵ Arai, relha erala thakerrama kala etatha nitjikanta, era kala ilutjina. Kannya relha erala relha arrpunha ntjarrannya impurlararnamanga erinha errilknga tutjika nukakwia, Yia Marrakakwia turta, era kala ngampakalala etatha nitjina. ³⁶ Thunga relhala alha nhandhaka yultha ingkarraka inthorra patilama, Altjirranha etarlaritjikanha. Erantama anma iluma. Nthakinstantama era nitjina? Era itja ngampakala etatha nitjina. ³⁷ Relhala turta yarna Altjirranha money nthama, Altjirrala erinha pmara ekuranhaka irrpulhelitjika, era Altjirraka pmaralantama ngampakala nitjinanga.

³⁸ “Arai, relha arrpunha ntjarra lyarta Altjirraka itja kangkama. Etna relha korna nama. Lakinhanganya thunga relha arrpunha errakarrerrama nukiperra alknghatharra angk-itjika, relha korna etnanha angkatja nukannya alpmelitjika paka. Relha erala nuka errakarerrama, era anma nthakinherritjina? Relhaka

'Lira era pitjalpumanga, era relha ekura errakar-rerritjinanema. Relhaka 'Lira era kunha anma pitjalputjina Kaartala erinha ekartilakangan-tama. Era turta angel alkngaltara ntjarrakarta pitjitjina.

9

¹ Jesuanha angkaka, "Atha rrangkarranha nhanha nthurpa ilama. Relha arrpunha ntjarra etnala lyarta nhanhala nama, etna katha aritjina Altjirranha relha ingkarrakaka Ingkarta namanga, etna ilutjikanhangantema."

Altjirrala kurtungurla urrputjanha ntelaka Jesuanha makalaria inthorra namanga
(*Matthew 17:1-13; Luke 9:28-36*)

² Etna kala arlta 6 nakalangantama, Jesuala Peter-anha, James-anha John-anha turta ntangkaka. Erantama etnakakarta parta kartninyaka ntjika, etnarrpa nitjika. Altjirralantama Jesuanha etnakanga alkngatharra kngartiwuka. ³ Jesuaka mantarrantama tjulkuka inthorra. Relhala yarna mantarra tjulkura lakinha ngerra mpaaramara. ⁴ Kurunga Moses Elijah tharrantama rumerraka, Jesualela angkarraka turta.

⁵ Peter-alantama Jesuanha ilaka, "Kaltjinthanhinthanhai, nurnataka kangkama pmara nhanhala nitjika. Unta paka antja namanga, nurna kala lyuntja tharraminyinta itamara, unkwanga nyinta, Moses-aka nyinta, Elijah-aka nyinta." ⁶ Kurtungurla etnataka trerraka inthorra. Lakinhang Peter-anha marntilparla wara angkaka.

⁷ Mataralantama etnanha korltanhaka. Matara ekurangantama etna Altjirranha angkamanga wuka, “Nhanha kunha ‘Lira nuka. Yinga ekura kangkama. Rrangkarra kala ekura kangkwer-ritjika.” ⁸ Ilkngaralhamalantama etna araka Jesua eranta itnamanga.

⁹ Etna partanga tnanpentjimangantama, Jesu-ala etnanha tjatjatuka etna itja inthorra relha arrpunhaka ilitjika, nhanga etnala arakala. Anmanta wara etna yia nhanha ilitjika, Relhaka ‘Lira era kala errilknga ntjarranga kamerakalangantama. ¹⁰ Etna kala Jesuaka kangk-werraka. Etna pula pmarrarraka, “Iwunhama nhanha erala ilakala era kula errilknga ntjar-ranga kameritjinala?”

¹¹ Kurtungurla etnantama Jesuanha pmarraka, “Iwunhangama artwa Intarrangaltha ntjar-rala ilama Elijah-anhakimparra pitjitjika, kurunganta Kristanha?”

¹² Jesuala etnanha ilaka, “Nthurrpa Elijah-anhakimparra pitjitjika, relha ingkarrakanha ar-ratjilitjika. Iwunhanga pula Altjirraka Angkatja Imankinyala ilama Relhaka ‘Lira era kngarra nyingalauwutjika, relha ntjarra turta ekura an-tjakunyerritjika? ¹³ Arai, atha rrankarranhanthurrpa ilama, Elijah-anha kala pitjika. Relha ntjarra turta ekura irrpaltherraka, Altjirraka Angkatja Imankinyala ilakala ngerra.”

*Jesuala worra nyintanha marrilaka
(Matthew 17:14-20; Luke 9:37-43a)*

¹⁴ Jesuanha, kurtungurla tharraminyinta nhanga turtantama kurtungurla arrpunha

ntjarrurna pitjalpuka. Etnantama araka relha worla kngarra kurtungurla arrpunha etnakalela itnamanga, kurtungurla etna turta artwa Intarrangaltha ntjarralela iwurramanga.

¹⁵ Relha ntjarrala Jesuanha aramalanga, etna tnołkarlahaka. Etnantama ekururna parrpa arrtjanaka.

¹⁶ Erantama etnanha pmarraka, “Iwunhiperama rrangarra angkatjala iwurrama?”

¹⁷ Relha nyintalantama Jesuanha ilaka, “Kaltjinthanhinhanhai, athataka worra nukanha unkwangurna kngitjika, era enka kornakarta namanga, yarna turta angkamanga.

¹⁸ Enka korna nhanha era worra nukanha errkumalanga, era erinha arnaka ilatuma. Rrakarta ekurantama alkurrrpalpurrkerrama, era itetja kakulhama, era errirterrama turta. Yingantama kurtungurla unkwanganha ntjarrurna ingkaka etna enka korna erinha worra nukanhanga unputjika. Etna pula enka korna erinha yarna kuta unpuka.”

¹⁹ Jesuala etnanha ilaka, “Rrangkarrataka arrthata, rrangarra turta Altjirranha itja tnakama. Kuta inthorrana yinga rrakangkarralela nitjika, rrangkarranha kaltjinthitjika turta? Rrangkarrataka yinganha porrkaporrkilama. Worra erinha nukurna kngitjai.”

²⁰ Etna worra erinha Jesuurna kngitjika. Enka korna era warta Jesuanha araka, kanha era worra erinha arnakarlakala ilatuka. Worra erantama arnala iwulhalapuka, rrakarta ekura turta alkurrrpalkurrrperraka.

²¹ Jesualantama worraka kaarta erinha pmarraka, “Ilangara inthorrama worra era lakinher-raka?”

Artwa era angkaka, “Katjia kurrkangatjina kunha era lakinha nentjika. ²² Ntjarraranga enka korna era worra erinha errilknga tutjika antja naka, erinha uraka iwumala, kwatjaka turta. Ilirnaka konyerrai, ilirnaka tangitjala nai turta. Unta paka enka korna erinha irrpalthala unpumarama?”

²³ Jesuala pula erinha pmarraka, “Iwunhangala unta yinganha ilpoiwumala pmarrama, ‘Unta paka enka korna erinha irrpalthala unpumarama?’ Relha erala Altjirranha tnakama, Altjirrala erinha ekarltilama enka korna turta unputjika.”

²⁴ Worraka kaartalantama Jesuanha angkatja intarrala ilaka, “Atha Altjirranha yarna ngerran-tema tnakama. Nuka tangitjala nai atha erinha ekarltalkura tnakitjinanga.”

²⁵ Jesuala arakantama relha ntjarra worler-rentjimanga. Erantama enka korna erinha rralthamala unpuka. “Enka kornai, untala worra nhanha erinha rirtilama, erinha angkitjika turta parrama, atha nganha ilama ekuranga rratai! Atha turta nganha parrama unta itja wotha worra ekururna irrputjika.”

²⁶ Ilkarlalthamala, worra erinha turta arnaka ilaturlalthamala, enka korna era kala worra ekuranga rrataka. Worra erantama errilknga ngerra intaka. Ntjarra arrpunhantama angkaka, “Era kunha kala iluka.” ²⁷ Jesuala pula worra

erinha iltjanga errkumala, erinha wotha ingkaka ingkairnaka.

²⁸ Anma, Jesuanha kala ilthaka irrpukalangan-tama, etnanta turtantama namalanga, kurtungurla ntjarrala erinha pmarraka, “Iwunhangama nurna enka korna erinha yarna unpuka?”

²⁹ Jesuala etnanha ilaka, “Relhala enka korna lakinha ngerra yarna unpuma, Altjirurna ingkamalanta wara.”

Jesuala wothantema kurtungurla ekuranha ntjarranha ilaka, arrpunha ntjarrala erinha errilknga tutjinala

(Matthew 17:22,23; Luke 9:43b-45)

³⁰ Anparerramala, Jesuanha, kurtungurla ekuranha ntjarrakarta Galilee-anga tjananhaka. Jesuanha pula itja antja naka relha arrpunha ntjarra kaltja nitjika pmara erala namalaka.

³¹ Erataka kurtungurla ekuranha ntjarranha kaltjinthalanaka. Era etnanha ilaka. “Arai, etnataka Relhaka ‘Lira erinha leltjaka lanthitjina. Etna erinha errilknga tutjina. Arlta tharraminyinta errilknga intamaliperra pula, era wotha kamerritjina.” ³² Kurtungurla ntjarrala pula Jesuaka angkatja itja lhangkaraka. Etna pula trerraka erinha kuta pmarritjika.

Relha erala relha arrpunha ntjarraka itornka nitjika antja, era relha arrpunha ntjarraka tangitjala nitjika

(Matthew 18:1-5; Luke 9:46-48)

³³ Jesuanha, kurtungurla ekuranha ntjarra tur-tantama Capernaum-akerritjalhaka. Iltha ekuranhurna irrpunhamala, Jesuala kurtungurla ekuranha ntjarranha pmarraka, “Iwunhiperama rrangkarra tjaiyala iwurraka?” ³⁴ Etna pula tjukunya naka. Etna itja antja naka erinha ilitjika etna nhanga pmarrarakala, “Nurnakanga ngunhama arrpunha ntjarraka itornka nitjina?”

³⁵ Arrarnalhamala, Jesuanha 12 etnaka ntangkalhaka. Erantama etnanha ilaka, “Relha erala relha arrpunha ntjarraka itornka nitjika antja, era itja tjurnalhitjika, era turta arrpunha ntjarraka kngarralkura tangitjala nitjika.”

³⁶ Jesuala katjia nyintantama inaka. Katjia erinha etnakanga mpopaka ingkairnamala, era katjia erinha kwakitjakaka. Kurunga era etnanha ilaka, ³⁷ “Relha erala katjiaka kangkintja ntelalhama, yinganha etarlaramala, era nuka kangkintja ntelalhama. Relha erala nuka kangkintja ntelalhama, era kala ekura kangkintja ntelalhama, erala yinganha yairnakala.”

*Relha erala Jesuaka tjina nama
(Luke 9:49,50)*

³⁸ John-ala Jesuanha ilaka, “Kaltjinthanhinthanhai, nurna artwa nyintanha araka enka korna ntjarra relha ntjarranga unpumanga, rretnya ungkwanganhala. Nurnantama erinha parraka, era itja worla nurnakanhanga nakalanga warta.”

³⁹ Jesuala pula etnanha ilaka, “Rrangkarra erinha itja parritjika. Arai, relha erala rretnya nukanhala tjatjikarta urrkapuma, era itja nukiperra parrpa korna angkitjina. ⁴⁰ Arai, relha erala nurnaka irrpaltherritjikanha, era kala nurnaka tjina nama. ⁴¹ Relha erala rrangkarranha kwatja ntjutjika nthama, yinganha etarlaramala, rrangkarra turta kurtungurla nuka namanga warta, Altjirrala erinha kala kwartiwutjina.”

Arrkarnintjiperra

(Matthew 18:6-9; Luke 17:1,2)

⁴² “Arai, relha erala tnakanhakanha nyintanha arrtjilhelamanga korna ntelalhitjika, erinha Altjirrala nakapakarlilitjina. Ekura kala marralkura namara, arrpunhala paka tnyana kngaritja turrkura ekuranhaka ilparanakalanga, erinha kwatja iparta inthorraka iwukalanga turta.

⁴³⁻⁴⁴ “Thunga iltja unkwanganhala nganha korna ntelalhitjika arrtjilhelama. Iltja erinha inturnai. Nhanha marralkura nama unta Altjirrala pmarurna irrputjika iltja nyintakaranta, nhanhangatjina, Altjirrala nganha iltja tharrakarta tatharrurna iwutjika. Tatharra ekurala kunha ura era itja kuta ilurnalhama.

⁴⁵⁻⁴⁶ Thunga ingka unkwanganhala nganha korna ntelalhitjika arrtjilhelama. Ingka erinha inturnai. Nhanha marralkura nama unta Altjirrala pmarurna irrputjika ingka nyintakarta, nhanhangatjina, Altjirrala nganha ingka tharrakarta tatharrurna iwutjika. ⁴⁷ Thunga alknga unkwanganhala nganha korna ntelalhitjika arrtjilhelama. Alknga erinha urlpuntjai. Nhanha

marralkura nama unta Altjirraka pmarurna ir-
rputjika alknga nyintakarta, nhanhangatjina, Al-
tjirralla nganha alknga tharrakarta tatharrurna
iwutjika. ⁴⁸ Tatharra ekurala mpaara etna itja
iluma, ura era turta itja ilurnalhama.

⁴⁹ “Priest-ala peinta kara tjauwerrilyaka ar-
rarnama, Altjirranha tjauwerrilyaka kangkitji-
nanga. Nurna Altjirranga urlarra arratja ntelal-
hamanga, nurna peinta nhanha ngerra nama.

⁵⁰ “Peinta kunha marra nama. Thunga pula
peinta era kornerraka. Relhala erinha yarna
wotha marrilama.

“Peintala kunha karalka kumiilama.
Rrangkarra peinta ngerra ntelalhitjika. Nhan-
hatitja rrangkarra kangkintja urlarrakurlarra
ntelalhitjika, rilhera turta.”

10

Mpanyiluntjiperra

(Matthew 19:1-12; Luke 16:18)

¹ Anparerramala, Jesuanha pmara
Judea-urnantama lhaka, Jordan Lhiranga
urntwarrampinyurna. Relha ntjarra ekurna
wothantema worlerrentjalpuka. Erantama
etnanha kaltjinthaka, erala relha ntjarraha
kaltjinthitjata ngerra.

² Artwa Pharisee urrputjantama ekurna
pitjika, erinha arrkarnitjika. Etna erinha
pmarraka, “Nhanha arratjama nama mpanya
ilutjika?”

³ Jesuala etnanha pmarraka, “Iwunhama
Moses-ala rrangkarranha turnaka?”

⁴ Etna erinha ilaka, “Moses-ala artwanha impurlarrarnaka noa ekuranha imputjika erinha kala pepanta nthamala angkatja nhandakarta, ‘Yinga kala unkwanganga unpulhakantama.’ ”

⁵ Jesuala pula etnanha ilaka, “Moses-ala rrangkarranha impurlarrarnaka noa rrakangkarranha imputjika, rrangkarra arrthata warta namanga. ⁶ Altjirrala pula relhanha arrpmarnamalanga, era etnanha orrea marla turta arrpmarnaka.

⁷ Lakinhangana artwala kaartana pa mia ekuranha impurlalhamala noa ekuranhalelantama kuterrama. ⁸ Noarta eratharra turtantama kala mpurrka nyinterritjina. Lakinhangana eratharra itja wotha tweta nama, nyinta pula. ⁹ Relhalantama itja ilngakitjika nhanga Altjirrala nyintalhelakala.”

¹⁰ Jesuanha, kurtungurla ekuranha ntjarrana turta wotha ilthala namalanga, kurtungurla ntjarrana erinha nhandhiperra pmarraka. ¹¹ Jesuala etnanha ilaka, “Artwa erala noa ekuranha unpuma, arrkutja arrpunha turtantama noa inama, era kala korna mpaarama. ¹² Arrkutja erala noa ekuranha unpuma, artwa arrpunha turtantama noa inama, era kala korna mpaaramantema.”

Jesuanha ntelalhaka era katjia ntjarrana kangkamanga

(Matthew 19:13-15; Luke 18:15-17)

¹³ Relha ntjarrana katjia etnakanha Jesuurna kngitjika, Jesuala iltja ekuranha kapurta etnakanhaka arrarnitjika. Jesuaka kurtungurla ntjarrana pula etnanha unpurlenaka.

¹⁴ Nhanha aramala, Jesuanha kurtungurla eku-ranha ntjarraka yirrkngerraka, etnanha ilaka turta, “Katjia etnanha parritjala impai. Yinga antja etna nukurna pitjitjika, Altjirranha antja namanga ntelalhitjika era Inggarta etnaka namanga. ¹⁵ Arai, atha rrangkarranha nhanha nthurrpa ilama. Rrangkarra Altjirranha itja tnakamanga katjiala ngerra, Altjirranha itja kuta rrakangkarra ntelalhitjina era Inggarta rrakangkarra namanga.” ¹⁶ Erantama katjia nyintaminyintanha nortaka tjurnaka, era iltja ekuranha kapurta etnakanhaka arrarnaka, nyintaminyintanha lyekarrilaka turta.”

*Jesua, artwa netaneta turta
(Matthew 19:16-30; Luke 18:18-30)*

¹⁷ Jesuanha wotha anparerraka. Artwa nyintantama ekurna arrtjanentjika, ekuranga urlarra mparalela arrarnalhaka turta. Erantama Jesuanha pmarraka, “Kaltjinthanhinhanha unta kunha artwa marra. Untantama yinganha ilai, Nthakinhamama yinga ntelalhitjika, yinga Altjir-raka pmarala ngampakala etatha nitjinanga?”

¹⁸ Jesuala erinha pmarraka, “Iwunhangala unta ilama yinga kula artwa marra namanga? Altjirra nyintanta kunha marra. ¹⁹ Arai, unta kala Altjirra turnintjaka kaltja. ‘Unta itja relha arrpunhanha errilnga tutjika.’ ‘Unta itja relha arrpunhaka noalela intitjika.’ ‘Unta itja relha arrpunhaka yultha nyilkgala initjika.’ ‘Unta itja relha arrpunhiperra orrtjerritjika.’ ‘Unta itja relha arrpunhanha orrtjapepilitjika.’

'Unta kaartu pa mia unkwanganhaka kangkwerritjika.' "

²⁰ Era Jesuanha ilaka, "Kaltjinthanhinthanhai, yinga pula turnintja nhanha ingkarrakaka kangkwerraka kurrkangatjina."

²¹ Jesuala erinha intarra araka, ekura kangkaka turta. Erantama erinha ilaka, "Nyintantantama unkwangathaka nama. Yultha ingkarraka unkwanganha yirrinthai, money erinha turtantama relha ilknagara ntjarranhanthai. Kurunga unkwanga yulthakngarra alkirala intitjina. Unta turtantama nukanga tnaartangala pitjai."

²² Nhanha wumala artwa era ltarrperraka, alpuka turta. Erataka netaneta inthorra naka.

²³ Jesuala kurtungurla ekuranhanthantama tjoraramala ilaka, "Arai, relha netanetaka kunha inpora inthorra nama Altjirraka pmarurna irrputjika." ²⁴ Angkatja nahanhala kurtungurla ntjarranhanthantolkelhaka. Jesualantama etnanhanthantema ilaka, "Katjia nukunhanthantarra, nahanhantakanthurpa inpora inthorra nama Altjirraka pmarurna irrputjika." ²⁵ Arai, nhanha rukaralkura nama camel needle-aka altjuranga tjananhitjika, nahanhangatjina, relha netaneta Altjirraka pmarurna irrputjika."

²⁶ Angkatja nahanha wumala, kurtungurla ntjarra kngarralkura tnoelkaka. Etnantama erinhanthantarra, "Relha ngunhanthantama Altjirralla irrpalthala tangkalhelamara?"

²⁷ Kurtungurla ekuranhanthantarra tjoraramala, Jesuala etnanhanthantema ilaka, "Thunga relhalla

etarlarama Altjirrala relhanha yarna tangkalhelama. Altjirrala pula relha ingkarrakanha irpalthala tangkalhelamala, era antja namanga warta.”

²⁸ Peter-alantama Jesuanha ilaka, “Arai, nurna kunha yulthalka, ramaramalka impurlalhaka unkwanganga tnaartangala lhitjinala.”

²⁹ Jesuala erinha ilaka, “Relha etnala nukakwia, Yia Marrakakwia turta iltha paka, kalya paka, kwaiya paka, tjia paka, kaarta paka, mia paka, katjia paka, pmara paka impurlalhamanga, ³⁰ etnanha Altjirrala kngarra inthorra kwartiwutjina. Etna alha nhanhalantema namalanga, Altjirrala etnanha iltha, kalya, kwaiya, tjia, mia, katjia, pmara turta nthitjina. Nhanha turta, arrpunha ntjarrala etnanha kornilitjika lurnitjina. Anma, Altjirraka pmarala pula etna ngampakala etatha nitjina. ³¹ Relha etnala lyarta arrkurlerramanga, etna ingkarnerritjina. Kanha relha etnala lyarta ingkarnerrama, etna arrkurlerritjinala.”

Jesuala kurtungurla ekuranha ntjarra wotha ilaka, Relha Lorinya ntjarrala erinha errilknga tutjinala

(Matthew 20:17-19; Luke 18:31-34)

³² Jesuanha Jerusalem-urna lhapalhaka. Kurtungurla ekuranha ntjarra, relha ntjarra arrpunha turta Jerusalem-urna lhapalhakantema. Jesuanha etnakanga arrkurla lhaka. Kurtungurla ntjarra ekuranga tnaartangala pitjika. Etna angkatja ekuranha tnakaka. Kanha relha arrpunha ntjarra etnala Jesualela lhapalhaka,

etna trerrakala. Jesualantama kurtungurla 12 etnanha ntangkamala wotha ilaka era anma nyingalauwutjinala. ³³ Era etnanha ilaka, "Arai, nurnataka nhanha Jerusalem-urna lhama. Jerusalem ekuralantama arrpunhala Relhaka 'Lira erinha priest itornka ntjarraka lanthitjina, artwa Intarrangaltha ntjarraka turta. Etnantama erinha imilitjina. Kurunga priest itornka etna, artwa Intarrangaltha etna turta erinha Relha Lorinya ntjarraka lanthitjina. ³⁴ Relha Lorinya etna erinha arrampowutjina, ekura palha iwutjina, erinha whip-ala tutjina, erinha errilknga tutjina turta. Arlta tharraminyinta errilknga intamaliperra pula, era wotha etatha kamerritjina."

Relha erala Altjirraka worlaka itornka nitjika antja nama, era kala arrpunha ntjarraka kngarra tangitjala nitjika

(Matthew 20:20-28)

³⁵ Zebedee-aka 'lira tharra, James John tharra, Jesuurna etinyerraka. Eratharrantama erinha pmarraka, "Kaltjinthanhinthanhai, ilirna nganha lyarta nyintaka pmarritjina. Ilirna turta antja unta ilirnakala kala kangkwerritjikanta."

³⁶ Jesuala erinhatharra pmarraka, "Iwunhakantama mpala antja?"

³⁷ Eratharra erinha ilaka, "Unta anma Inkartantama namanga, ilirna antja nama nyinta unkwanganga akwala nitjika, arrpunha unkwanganga kwanginyala."

³⁸ Jesuala pula erinhatharra ilaka, "Mpalataka marntilparla wara pmarrama. Mpala paka

nukalela nyingalauwumarama? Mpala paka nukalela ilumarama, yingala ilutjinala ngerra?”

³⁹ Eratharra angkaka, “Awakwia.”

Jesuala pula erinhatharra ilaka, “Mpala nthurra anma nyingalauwutjina, yingala nyingalauwutjina ngerra. Mpala turta anma ilutjina, yingala ilutjina ngerra. ⁴⁰ Relha ngunha pula nukanga akwala nitjina, relha ngunha turtama nukanga kwanginyala nitjina? Nhanha itja nukathaka nama. Nhanha Altjirrakathakanta nama. Era turta kala relha erinhatharra urrakala.”

⁴¹ Kurtungurla 10 arrpunhala James John thar-ranha wumalanga, etna ekuratharra yirrkngerraka. ⁴² Jesuala pula kurtungurla etnanha worlil-amala etnanha ilaka. “Rrangarra kala kaltja Relha Lorinya ntjarraka itornka, etna relha etnakanhaka tjitjarterrama. Relha kngarra ntjarra turta relha kornakorna ntjarraka tjitjarterrama. ⁴³ Worla nukanhala pula itja lakinha ngerra nitjika. Relha erala worla nukanhala itornka nitjika antja nama, era kala arrpunha ntjarraka tangitjala nitjika. ⁴⁴ Relha erala worla nukanhala itornka kngarra nitjika antja nama, era kala arrpunha ntjarraka kngarra tangitjala nitjika. ⁴⁵ Arai, Relhaka ‘Lira pitjika relha ntjarraka tangitjala nitjika, itja etna ekura tangitjala nitjika. Era pitjika relha ntjarrakakwia ilutjika, etnanha tangkalhelitjika turta.”

*Jesuala Bartimaeus-aka alknga marrilaka
(Matthew 20:29-34; Luke 18:35-43)*

⁴⁶ Jesuanha, kurtungurla ekuranha ntjarra turta Jericho-urna lhaka. Etna wotha Jericho-anga anparerramalanga, worla kngarra etnakanga tnaartangala lhaka. Artwa panga nyinta, Bartimaeus, Timaeus-aka worra, tjaiyanga kutala narlanaka, marnaka enkamala. ⁴⁷ Era wumalanga Jesuanha, pmara Nazareth-arinya, anpara lhamanga, era ekura ilkaka, "Jesuai, David-aka 'Lirai, nuka montjamontja ntelalhai!" ⁴⁸ Ntjarrala erinha turnaka, "Tjukunyerrai!" Era pula intarra kuta ilkaka, "David-aka 'Lirai, nuka montjamontja ntelalhai!"

⁴⁹ Itnatjalhamala Jesuala etnanha turnaka, "Erinha ntangkai."

Etnantama artwa panga erinha ntangkaka, erinha ilaka turta, "Kala arrkana nai. Kamerai turta, era unkwanga ntangkalhamanga." ⁵⁰ Mantarra coat ekuranha ilumala, era kameramala Jesuurna arerraka.

⁵¹ Jesualantama erinha pmarraka, "Iwunhangala unta nuka ilkaka?"

Artwa panga era angkaka, "Itornkai, alknga nukanha marrilai."

⁵² Jesuala erinha ilaka, "Kala lhai. Unta yinganha tnakakalanga, atha alknga unkwanganha marrilaka."

Artwa era kala arakantama. Erantama Jesuanga tnaartangala lhaka.

11

*Jesuanha king ngerra Jerusalem-urna irrpuka
(Matthew 21:1-11; Luke 19:28-40; John 12:12-19)*

¹ Jesuanha, kurtungurla ekuranha ntjarra turta kala Jerusalem-aka etinyerramangantama, etna pmara Bethphage, Bethany tharrurna pitjika. Pmara nhanha tharrataka Olive Partanga kutala italhaka. Jesualantama kurtungurla tharra ekuranha arrkurla yairnaka. ² Era erinhatharra ilaka, "Pmara kurrka arrpunha tanhurna lharrai. Pmaraka irrpunhamala ngerra mpala donkey kurrka aritjina, rope-ala yirnakala. Donkey nanhaka relha itja arrkurla ntjikala paka. Rope erinha ilumala, donkey erinha nukurna kngitjai. ³ Thunga arrpunhala mpalanha pmarritjina, 'Iwunhangala mpala donkey erinha kngama?' Mpala erinha ilai, 'Ingartanha kunha ekura antja. Ingartala turta erinha parrpa yairnitjalputjina.' "

⁴ Kurtungurla eratharra lharraka. Eratharra turta donkey erinha araka rope-ala yirnakala, iltha nyintaka reoanga kutala itnamanga, street-ala. Eratharrantama rope erinha iluka. ⁵ Relha urrputja ntjarra ngerra lenhala itnarlanaka. Etnakanga urrputja arrpunhala pmarraka, "Iwunhangala mpala donkey erinha kngama?" ⁶ Eratharrantama etnanha ilaka, Jesualala erinhatharra turnakala ngerra. Etnantama erinhatharra impurlarrarnaka donkey erinha kngitjika.

⁷ Kurtungurla eratharrantama donkey kurrka erinha Jesuurna rretjingaka. Kurtungurla etnantama mantarra coat etnakanha donkey ekura arrarnaka. Jesuanha turtantama donkey ekura ntjika. ⁸ Relha ntjarralantama mantarra coat etnakanha tjaiyaka ntjamiwuka. Kanha relha

arrpunha ntjarrala tnukulpala walya kamala, walyala tjaiyaka ntjamiwuka.

⁹ Relha ntjarra Jesuanga arrkurla lhaka. Relha ntjarra arrpunha turta ekuranga tnaartangala pitjika. Etna ingkarraka intarra ilkarlanaka, “Nurna Altjirranha tnantjama.

Altjirrai, urrpia unkwanganha lyekarrilai, erala lyarta nurnakurna pitjima.

¹⁰ Altjirrai, erinha lyekarrilai, erala kaarta nurnaka David-aka kathala tjitjarterritjinala. Nurna Altjirranha kngarra inthorra tnantjama.”

¹¹ Jerusalem-urna irrpumala, Jesuanha temple-urna lhaka, temple erinha turta tjoraraka. Kala ngurrangurrerrakalangantama, era Bethany-urna alpuka, kurtungurla 12 ekuranhakarta.

*Jesuala irna tjurrka nyinta kornilaka
(Matthew 21:18,19)*

¹² Ingutnhala, Jesuanha kurtungurla ekuranha ntjarrakarta Bethany-anga rratamala lhaka. Tjaiyakerramala Jesuanha ngaiyala wulhaka.

¹³ Erantama irna tjurrka urntwarraka araka, kala ilpalhakarterrakala. Jesuanhantama irna tjurrka ekururna lhaka marnaka yonthitjika. Etinyerramala pula era ilpalhanta araka, marna tjurrkaka antala lyartathakanga warta.

¹⁴ Jesualantama irna tjurrka erinha ilaka, “Lyartanga relhala itja wotha unkwanganga marna ilkutjina!” Kurtungurla ekuranha ntjarrala erinha wuka era lakinha angkamanga.

*Jesuanha temple-ala
(Matthew 21:12-17; Luke 19:45-48; John 2:13-22)*

15 Jerusalem-urna irrpunhamaliperra, Jesuanha temple-urna lhaka. Temple kwanala artwa ntjarra nitjata, etnala nturrurta yirrinthitjata, relha epinyaka money turta ekgarrpunhilitjata. Jesualantama etnanha unpurlenaka, table etnakanha, chair etnakanhalka turta ankartiwuka. 16 Era turta relha lenha ntjarranha parraka, etnala temple-anga wara tjananhitjata, yultha etnakanhakarta. 17 Erantama etnanha kaltjinthamala ilaka, “Altjirraka Angkatja Imankinyala ilama, ‘Iltha nuka relha ingkarrakaka pmara nitjika, pmara nhanganga ekurnala etna pitjima nukurna ingkitjika.’ Kanh rrankarra iltha nukannya nyilkgampaka pmaratitjala mpaaraka.”

18 Priest-aka itornka ntjarrala, artwa Intarrangaltha ntjarrala turta Jesuanha wukantema era lakinha angkamanga. Etnantama antja naka erinha errilknga tutjika. Etna pula Jesuanga trerraka, relha ntjarra angkatja ekuranhaka antja inthorra namanga.

19 Kala ngurrangurrerrakalangantama, Jesuanha kurtungurla ekuranha ntjarrakarta Jerusalem-anga wotha rrataka.

Jesuala yia alpmelaka irna tjurrka ntjirrker-rakala ekuriperra

(Matthew 21:20-22)

20 Ingutnhalantama, etna wotha tjaiya nhangala Jerusalem-urna lhapalhaka. Kurtungurla ntjarrala araka irna tjurrka nhanganga kala ntjirrker-rakala, takarrangatjina kartnakurtitja, ntjapara kuta. 21 Peter-anhantama ilpangkamala

angkaka, “Kaltjinthanhinthanhai, irna tjurrka nhanga untala kornilakala arai. Era kala ntjirrkerrakantama.”

²² Jesualantama etnanha ilaka, “Altjirranha tnakai. ²³ Atha rrangkarranha nthurupa ilama. Thunga rrangkarra parta nghanurna angkitjina, ‘Katha nghananga naamerrai, kwatja laiyyaka turta iwulhai!’ Rrangkarrantama Altjirranha tnakamanga, itja inthorra turta ilpoiwwumanga, parta era kala naamerritjina. ²⁴ Lakinhanganga atha rrangkarranha ilama. Rrangkarra Altjirruna ingkamanga, rrangkarra erinha tnakitjika era rrangkarranha kala wumanga.

²⁵⁻²⁶ “Thunga rrangkarra Altjirruna ingkama. Thunga turta rrangkarra ilpangkama relha arpunhala rrangkarranha kornilakala. Kala relha lenhaka korna iwai. Kurunga Altjirrala korna rrangkarranha iwutjinantema.”

Priest itornka ntjarrala, kngarripata ntarntarintja ntjarrala turta Jesuanha pmarraka: Ngulanhanha turnaka relha ntjarranha kaltjinthitjika? (Matthew 21:23-27; Luke 20:1-8)

²⁷ Jesuanha, kurtungurla ekuranha ntjarra turta wotha Jerusalem-urna irrupuka. Jesuanhantama temple-ala nthulapumalanga, priest itornka ntjarra, kngarripata ntarntarintja ntjarra, artwa Intarrangaltha ntjarra turta ekururna pitjika. ²⁸ Etna erinha pmarraka, “Ngunhalama nganha ingkairnaka artwa ntjarranha temple-anga unputjika? Nghanha unkwangathaka namama? Ngunhala turtama nganha turnaka relha ntjarranha kaltjinthitjika?”

²⁹ Jesuala etnanha ilaka, “Atha turta rrankarranhanha pmarritjina. Rrankarra paka yinganha ilamanga, atha turta rrankarranhanha alpmelitjinantema. ³⁰ Rrankarra yinganha ilai, “Ngunhalama John-anhanha turnaka relhanha ntjarranhanha kaltjirrpulhelitjika? Thunga Altjirralla? Thunga relhala paka?”

³¹ Nhanhiperra eterramala, etna lakinhanha ilaraka. “Nurna paka erinhanha ilamanga, Altjirralla erinhanha turnakala, era nurnanhanha ilitjina, ‘Iwunhangantama rrankarra erinhanha itja tnakaka?’ ³²⁻³³ Nurna paka erinhanha ilamanga, relhala erinhanha turnakala, relhanha ntjarralla nurnakana yirrkngerritjina.” Relhanha ntjarranga urlarra John-anhanha Altjirraka urrpia naka. Lakinhanha, relhanha ntjarranga trerramala, etna Jesuanhanha ilaka, “Nurna itja kaltja.”

Jesualantama etnanhanha ilaka, “Lakinhanha atha turta rrankarranhanha itjantema alpmelitjina.”

12

Yia marna grapes tnukulpiperra (Matthew 21:33-46; Luke 20:9-19)

¹ Jesualantama etnanhanha yia arrpunhanha nghanha ilaka. “Artwa nyintala marna grapes ingkairnakanha tnukulpa ekuranhala. Erantama parta inamala, tnukulpa ekuranga fence itaka. Era iparta turta tnyaka, nghanha marna grapes etnanhanha anma nharrkutjika. Era iltha tjenya turta itaka, artwala kartninyanga tnukulpa erinhanha kartaritjinanga. Kurunga era tnukulpa erinhanha

artwa arrpunha ntjarraka rent-emilaka. Artwa erantama pmara arrpunhurna lhaka.

² “Marnaka kotjintjaka antalalantama, artwa era urrkapunhapunha nyinta yairnaka rent money ekuranhaka. ³ Artwa etna pula urrkapunhapunha erinha errkuka. Erinha tumala, etna erinha rapa kuta yairnarlenaka.

⁴ “Kurtwia erantama urrkapunhapunha arrpunha artwa etnakurna yairnaka. Urrkapunhapunha nhanha erinha etna kapurtala tuka, arrampowuka turta. ⁵ Kurunga kurtwia era urrkapunhapunha arrpunha yairnaka. Nhanha erinha etna errilknga tuka. Kurunga era urrkapunhapunha arrpunha ntjarra turtantama yairnaka. Artwa etnantama urrkapunhapunha nhanha etnakanga arrpunha ntjarranha tuka, arrpunha ntjarranha errilknga tuka turta.

⁶ “Kurtwia ekura urrkapunhapunha arrpunha itja naka yairnitjika, kala ‘lira ekurantantama. ‘Lira nhanha ekura era kngarra kangkaka. Erinha yairnamala, era lakinha eterraka, ‘Etna ekura kangkwerritjina.’ ⁷ Artwa etna pula lakinhala angkarraka. ‘Nhanha kunha ‘lira era. Anma tnukulpa nhanha ekurantama nitjina. Mpa, nurna erinha errilknga twiai, tnukulpa nhanha kala nurnakantama nitjina.’ ⁸ Etnantama ‘lira erinha errikumala errilknga tuka, erinha tnukupanga kathurna iwuka turta.”

⁹ Jesualantama etnanha pmarraka, “Nthakin-hama rrankarra etarlarama? Tnukupakurtwia era kunha yirrknga inthorra nitjina. Eran-tama pitjimala artwa nhanha etnanha errilknga

tutjina. Kurunga era tnukulpa erinha ar-
rpunha ntjarranhantama nthitjina ekura ntarn-
taritjika. ¹⁰ Rrangkarra kala Altjirraka Angkatja
Imankinya nhandhaka kaltja,

‘Parta nhanga iltha itanha ntjarrala

ipmintja iwukala,

erantama lyarta parta tjiparralkura era nama.

¹¹ Inggarta erarrpa ilaka era

tjiparralkura namanga.

Nurna kala tnolkamanta, nhandha aramala.’ ”

¹² Itornka ntjarra kaltja naka era yia nhandha
etnakiperra ilamanga. Etnantama antja naka
erinha errkutjika. Etna pula relha ntjarranga
trerraka. Lakinhang a etna erinha impurlal-
hamala, kala alpukantama.

Tax money-iperra

(Matthew 22:15-22; Luke 20:20-26)

¹³ Itornka ntjarrala artwa Pharisee urrputja,
Herod-aka urrkapunhapunha urrputja turta
Jesuurna yairnaka, erinha arrkarnitjika.

¹⁴ Ekururna pitjimala, etna erinha ilaka,
“Kaltjinthanhinthanhai, nurna kaltja unta
artwa ilporatha namanga. Nurna turta kaltja
unta itja relhanga trerrama. Unta turta relha
ntjarranha kaltjinhama Altjirringa urlarra
arratja ntelalhitjika. Nurnanha ilai, Altjirralla
nurnanha turnamama, nurna Caesar-anha tax
money nthitjika? ¹⁵ Nhandha turtama arratja
nama nurna tax money nthitjika?”

Jesuanha kaltja naka etna erinha pmathala wara pmarramanga. Erantama etnanha pmarraka, "Iwunhangama rrankarra yinganha ar-rkarnama? Yinganha tax money unkwaltja nthai."

¹⁶ Etnantama erinha money unkwaltja nyinta nthaka. Erantama etnanha pmarraka, "Ngunhaka ntolyama money ekurala nama? Ngunhaka rretnya turtama money ekurala nama?"

Etna erinha alpmelaka, "Caesar-akakwia."

¹⁷ Jesualantama etnanha ilaka, "Money nhanha Caesar-aka namanga, rrankarra nhanha kala Caesar erinha ntharrirrai. Rrankarra turta Altjirraaka kangkwerrai, erala rrankarranha turnakala ngerra." Angkatja nhanha wumala, etna tnolkakanta.

Relhaka kamerrintjiperra

(Matthew 22:23-33; Luke 20:27-40)

¹⁸ Artwa Sadducee ntjarrantama Jesuurna pitjika. Artwa Sadducee etnataka ilitjata relha errilknga ntjarra itja kamerritjinala. Etnantama Jesuanha pmarraka, ¹⁹ "Kaltjinthanhinhanhai, Moses-ala nurnanha lakinha turnaka. Thunga artwa nyinta katjiakunya iluma. Kurunga tjia ekuranhala warlukurta erinha noa initjika, nhanga kalya ekuranhaka katjia intitjinanga paka. ²⁰ Arrpunharanga kanhanganhanga 7 naka. Kalya kngarralakimparra noa inaka. Era pula katjiakunya iluka. ²¹ Lakinhanganya kalya arrpunhala warlukurta erinha noa inaka. Era turtantama iluka, katjiakunya. Kurunga kalya arrpunhala warlukurta erinha noa inaka. Era

turta katjiakunyantema iluka. ²² Kala kanhanganhanga 7-ala arrkutja nyinta erinha noa tnyinaka. Kanhanganhanga etna ingkarraka katjiakunya iluka. Ingkarna arrkutja era turtantama iluka. ²³ Anma Altjirrala relha ingkarakanha kamalhelamanga, ngunhaka noantama arrkutja era nitjina? Kanhanganhanga 7-ala kunha erinha noa tnyinakala.”

²⁴ Jesuala etnanha ilaka, “Rrangkarrataka paalakarla pmarrama. Rrangkarra kunha Altjirra Angkatja Imankinyaka kotna. Rrangkarra turta kngwerraka Altjirranha ekarlta inthorra namanga. ²⁵ Anma, Altjirrala relha errilknga ntjarranha kamalhelamanga, etna itja noa inarritjina. Etna kala angel ntjarra ngerra nitjina. ²⁶ Altjirrala kala relha errilknga ntjarranha kamalhelitjina. Rrangkarra itjala Moses-aka pepala read-erraka? Iwunhama Altjirrala Moses-anha ilaka irna mpumala kwananga? Era kunha erinha ilaka, ‘Yinga Abraham-aka Altjirra nama, Isaac-aka Altjirra, Jacob-aka Altjirra turta.’ ²⁷ Arai, Altjirranha relha etatha ntjarraka Altjirra nama, itja relha errilknga ntjarraka. Artwa Sadducee ntjarrai, rrangkarrataka paala kuta eterrama.”

*Altjirra turnintja kngarra era
(Matthew 22:34-40; Luke 10:25-28)*

²⁸ Jesuanha artwa Sadducee ntjarralela iwurramalangantema, artwa Intarrangaltha nyinta Jesurna pitjika. Era wuka Jesuala artwa Sadducee etnanha arratja kuta ilamanga. Erantama

Jesuanha pmarraka, “Yinganha Altjirra turnintja kngarra erinha ilai.”

²⁹ Jesuala erinha ilaka, “Nhanha turnintja kngarra era. ‘Relha Israel-arinya ntjarrai, wurrirrai. Altjirra nyinta wara nama. Altjirra era Ingkarta nama. Era turta Altjirra nurnaka nama. ³⁰ Untantama Ingkarta Altjirra unkwanganhaka kngarra inthorra kangkitjika. Unta ekura kuta eteritjika. Unta erinhanta tnakitjika. Unta ekuranta kangkwerritjika turta.’ ³¹ Turnintja arrpunha nhanha turta kngarra namantema. ‘Unta relha arrpunha ntjarraka kangkitjika, untala unkwangarrpa kangkamanga ngerra.’ Turnintja nhanha tharranga turnintja arrpunha itja kngarralkura nama.”

³² Artwa Intarrangaltha era angkaka, “Kaltjinthanhinthanhai, unta nurnanha kala arratja kuta ilaka. Altjirra nyinta wara nama. Eranta Altjirra nurnaka nama. ³³ Nurnantama ekuranta kngarra inthorra kangkitjika. Nurna ekura kuta eteritjika. Nurna ekuranta kangkwerritjika. Nurna turta relha arrpunha ntjarraka kangkitjika, nurnala nurnakarrrpa kangkamanga ngerra. Turnintja nhanha tharraka kangkwerritjika, nhanha kunha tjiparralkura nama temple-aka tjauwerrilya ingkarrakangatjina.”

³⁴ Jesuala wumalanga era arratja kuta angkamanga, era erinha ilaka, “Unta ingkwa inthorra Ingkartaka tjinerraka.” Nhanhiperra, relha arrpunha itja wotha irrpaltherraka erinha pmarritjika.

*David-aka 'liriperra**(Matthew 22:41-46; Luke 20:41-44)*

³⁵ Jesuala relha ntjarranha temple-ala kaltjinthamalanga, era etnanha ilaka, "Artwa Intarrangaltha ntjarrala ilama Kristanha David-aka 'lira namanga. Nthakinha inthorrantama era David-aka 'lira nama?" ³⁶ Enka Alkngaltara era kunha David-anha turnaka lakinha angkitjika,

'Inkarta era Inkarta nukanha ilaka: akwa nukanhanga arrarnalhai, atha leltja unkwanganha ntjarranharrka pmakwinitjina.

³⁷ David-ala paka Kristanha Inkarta kakalanga, nthakinhantama Kristanha David-aka 'lira nama?"

Relha worla kngarra etna kangkaka Jesuala etnanha kaltjinthamanga.

*Jesuala relha ntjarranha ilaka etna aralhitjika, artwa Intarrangaltha ntjarrala etnanha kaltjinthamanga**(Luke 20:45-47)*

³⁸ Jesuala relha ntjarranha kaltjinthamalanga, era etnanha nhanha turta ilaka, "Rrangkar-rataka artwa Intarrangaltha ntjarranga aralhitjika. Etna kangkama mantarra tjenyakarta nthulaputjika. Etna antja nama relha ntjarrala etnanha anparnitjika etna shop-ala namalanga. ³⁹ Etna synagogue-urna lhamalanga, etna antja nama arrkurlala nitjika, relha ntjarrala etnanha aritjinanga. Arrpunhala etnanha marna ilkutjika ntangkakalanga, etna antja nama itornka ntjarranga kuta nitjika.

⁴⁰ Etna pula warlukurta ntjarraka iltha pmathala rakama. Etna turta Altjirurna tjarrilpmintja ingkarlanama, relhala etnanha tnantjitjinanga. Altjirrala etnanha kngarra inthorra rrarrathala tutjina.”

*Arrkutja warlukurtaka tjauwerrilyiperra
(Luke 21:1-4)*

⁴¹ Jesuanha temple-ala narlanaka. Erantama araka relha ntjarrala tjauwerrilya iwetnamanga, tjauwerrilyakanha box-aka. Era araka turta artwa netaneta arrpunha ntjarrala tjauwerrilya kngarra kuta iwetnamanga. ⁴² Kurunga era araka arrkutja warlukurta ilkngarala money kurrka iwumanga, nhanga money relhalala nthama marna nyinta buy-emilitjika.

⁴³ Kurtungurla ekuranha ntjarraka ntangkalhamala, era etnanha ilaka. “Atha rrangkarranha nthurpa ilama. Warlukurta ilkngara nhanhala kngarralkura nthaka, relha arrpunha ingkarrakangatjina. ⁴⁴ Relha netaneta ntjarrala tjauwerrilya nthamaliperra, etnaka money kngarra kuta intaka. Kanha warlukurta era money ingkarraka ekuranhala nthaka. Ekura itja wotha intaka marna nyintalka paka buy-emilitjika.”

13

*Jesuala ilaka leltja ntjarrala Altjirra temple
urltakitjinala*

(Matthew 24:1,2; Luke 21:5,6)

¹ Jesuanha temple-anga rratanhamangantama, kurtungurla ekuranha nyinta ekururna angkaka.

“Kaltjinthanhinthanhai, parta nhanha ntjarra arai, iltha nhanha ntjarra turta. Etna kunha intorta inthorra.”

² Jesuala pula erinha ilaka, “Unta iltha kn-garritja nhanha ntjarranha arama? Leltjala iltha etnanha unkwaltjilitjina. Parta kngarritja nyintantama itja parta kngarritja arrpunhanga kartninyala intitjina. Ingkarraka arnala intitjina, leltjala errarnpalhelakala.”

*Relhaka imampurla kngarra anma nitjina
(Matthew 24:3-14; Luke 21:7-19)*

³ Anma, Jesuanha Olive Partala-ntama namalanga, temple-urnathaka, Peter-anha, James-anha, John-anha, Andrew-anha turta ekururna etinyerraka. Etnantama erinha pmarraka,
⁴ “Nurnanha ilai, ilangarama lakinherritjina? Nthakinha turtama nurna kaltja nitjina leltja etna pitjitjikerramanga, iltha nhanha etnanha unkwaltjilitjika?”

⁵ Jesuala etnanha ilaka, “Rrangkarrataka aral-hitjika arrpunhala rrangkarranha orrtjapepilak-itja. ⁶ Ntjarra kunha anma pitjimala angkitjina, ‘Jesuala yinganha yairnaka. Yinga nama Krista era.’ Orrtja krista nhanha ntjarralantama relha ntjarranha orrtjapepilitjina.

⁷ “Anma rrangkarra wumalanga relha arrpunha ntjarra turramanga, relha arrpunha ntjarra turta turritjikerramanga kula, rrangkarra itja treritjika. Nhanha kunha kala lakinha nitjikarrpa. Alha era pula itjantema yirritjina.
⁸ Pmararinya ntjarra, pmararinya arrpunha ntjarralela turritjina. King nyinta turta, king

arrpunhaka irrpaltherritjina. Katha arrpunhala alha era errowutjina. Katha arrpunhala mar-naka paalerrintja nitjina. Nhanha lakinherra-malanga rrangkarra kaltja nitjika relha ntjarra imampurlerritjinantama.

⁹ “Rrangkarrataka aralhitjika. Etna kunha rrangkarranha errkumala court-urna kngitjina. Etna turta rrangkarranha synagogue kwanala whip-ala tutjina. Etna turta rrangkarranha itornka kngarra ntjarranga urlarra ilparnitjina, king ntjarranga urlarra turta, rrangkarra yin-ganha tnakamanga. Nhanha kala lakinha nitjika, rrangkarra etnanha nukiperra ilitji-nanga. ¹⁰ Arai, rrangkarra kunha Yia Marra erinharrka relha ingkarrakanha ilitjika alha pan-pala.

¹¹ “Thunga etna rrangkarranha errkuma, court-urna turta kngama. Rrangkarra itja ar-rkurlantema thakerritjika, lakinha eterramala, ‘Nthakinhantama nurna angkitjika?’ Arai, etna rrangkarranha pmarramalanga, kala angkatja lenhanta angkai, Enka Alkngaltaralala rrangkar-ranha ilitjinala. Era kunha rrangkarranha il-itjina angkatja rrangkarrala angkitjika.

¹² “Artwalantama tjia ekuranha lanthitjina ar-punhala errilknga tutjika, kaartala turta katjia ekuranha, katjiala turta kaartala pa mia ekuranha. ¹³ Relha ingkarraka rrakangkarra antjakunya nitjina. Altjirrala pula rrangkarranha tangkalhe-litjina, rrangkarra yinganha talwalpula tnaka-manga.”

Relha Jerusalem-arinyaka imampurla kngarra nitjina

(Matthew 24:15-21; Luke 21:20-24)

¹⁴ “Anma rrangkarra aritjina etna irna ortja altjirra Altjirraka temple-aka ingkairnamanga, Altjirranha arrampowutjika. (Relha erala pepa nhanhaka read-erramanga, era etarlariau!) Kurunga relha Judea-arinya kala parturnanta naameritjika. ¹⁵ Relha erala iltha kaputhala namanga, era turta kala naameritjikanta. Era itja iltha ekuranhurnarrka irputjika, yulthaka. ¹⁶ Relha erala tnukulpa eku-ranhala urrkapumanga, era turta kala naameritjikanta. Era itja iltha ekuranhurnarrka alputjika, mantarra ekuranhaka. ¹⁷ Arai, arrkutja inpora ntjarraka imampurla inthorra nitjina, arrkutja katjia kurrka ipatja ntjunhinja ntjarrakartaka turta. ¹⁸ Ingkarrirrai turta rrangkarra itja lhurrpala naameritjika. ¹⁹ Arai, antala lenhala relha ntjarra kngarra inthorra nyingalauwutjina. Relha itja arrkurla lakinha ngerra nyingalauwuka paka. Anma turta relha itja wothe lakinha ngerra nyingalauwutjina. ²⁰ Altjirranha pula relha ekuranha ntjarraka montjamontja ntelalhitjina. Lakinhanganga era itja relha ingkarrakanha kuta inthorra nakapakarlilitjina, etna ingkarraka ilukitja, kngarra nyingalauwumala.

²¹ “Arai, relhala paka rraangkarranha ilamanga, ‘Krista era nghanhai.’ Arrpunhala pula rrangkarranha ilamanga, ‘Itja. Era tanha nama.’ Rrangkarra angkatja etnakanha itja tnakitjika.

²² Orrtja krista ntjarra, orrtja urrpia ntjarra

turta pitjitjina. Etna tjtjikarta kngarra turta urrkaputjina. Etna arrkarnitjina Altjirraka tjina ntjarranha orrtjapepilitjika. ²³ Rrangkarrataka aralhitjika. Arai, atha rrangkarranha mparrama ilama, rrangkarra kaltja nitjinanga.”

Relhaka ‘Lira pitjalpumalanga, relha ingkar-rakala nhanha katha aritjina

(Matthew 24:29-31; Luke 21:25-28)

²⁴ “Kurunga imampurla nhanhiperrantama, ‘Altjirrara lirnnga erinha ilurnitjina, taiya erinha turta.

²⁵ Era nthelipura etnanha ngarlpangalhelitjina, etnanha alkiranga tnyilhelitjina turta.’

²⁶ “Kurunga relha ingkarrakala aritjina Relhaka ‘Lira era matarala pitjimanga. Era ekarlta inthorra, makalaria inthorra turta ntelalhitjina.

²⁷ Erantama angel ekuranha ntjarranha yairnitjina relha ekuranha ntjarranha pmararrpan-inhanga worlilitjika.”

Yia irna tjurrkiperra

(Matthew 24:32-35; Luke 21:29-33)

²⁸ “Irna tjurrka ekuranga kaltjerrai. Et-intja ekura pulyerramalanga, ilpalha turta rrata-malanga, rrangkarra kaltja inguntha wara kala wumpieritjina. ²⁹ Lakinhangra rrangkarra aramalanga angkatja nukanha nthurrperramangan-tama, rrangkarra kaltja nitjika Relhaka ‘Lira era kala pitjalputjikerramanga. ³⁰ Atha rrangkar-ranha nthurra ilama. Angkatja nukanha kala nthurrperritjina ramarama nhanha namalangantema. ³¹ Alkira nhanha kala yirritjina, alha

nhanha kala yirritjinantema. Angkatja nuka pula itja kuta yirritjina.”

Relha itja kaltja ilangara Jesuanha pitjalputjina

(Matthew 24:36-44)

³² “Ilangara inthorra pula Relhaka ‘Lira era pitjalputjina, nanhaka relha nyinta itja kaltja. Angel alkirarinya etna itja kaltja. ‘Lira era itja kaltja. Kaarta eranta kaltja. ³³ Lakinhang rrankarra aralhitjika, kaarra turta nitjika, rrankarra kotnanga warta ilangara inthorra era pitjalputjina. ³⁴ Arai, lakinha ngerrataka nama. Pmarakurtwia era pmara arrpunhurna lhitjika antja naka. Era urrkapunhapunha ekuranha ntjarranha turnaka arratja kuta urrkaputjika. Era iltha ntarntarintja erinha turta turnaka iltha erinha arratja kuta kaaritjika. Kurunga era lhaka. ³⁵ Lakinha ngerra rrankarra turta kuta kaarra nitjika. Rrankarra itja kaltja ilangara pmarakurtwia era pitjalputjina. Thunga era ngurrangurra pitjalputjina. Thunga ingwa mpopala. Thunga lirnga rratitjikerramanga. Thunga ingutnhala. ³⁶ Rrankarrataka kaarra nitjika, era nhang itnatjalhamalanga, era rrankarranha ankwentamanga arakitja. ³⁷ Angkatja athala rrankarranha nhanha ilama, atha kala relha ingkarrakanha ilama. Kaarra narrirrai.”

14

*Priest-aka itornka ntjarra, artwa
Intarrangaltha ntjarra turta angkarraka*

Jesuanha errilknga tutjika

(Matthew 26:1-5; Luke 22:1,2; John 11:45-53)

¹ Kala arlta tharrantantama naka relha ingkarrakala Passover tjinkarra erinha ilkutjinala, Marna Ekalha erinha turta. Priest-aka itornka ntjarra, artwa Intarrangaltha ntjarra turtantama angkarraka. Etna antja naka Jesuanha nyilknganyilkngala errkumala, errilknga tutjika. ² Relha ntjarra pula Jesuaka kngarra kangkamanga, etna ilarraka, “Nurna erinha itja Passover-aka arlatala errkutjika, relha ingkarraka kekarta lhakitja.”

Jesuanha Bethany town-ala

³ Bethany town-ala artwa nyinta naka, rretnya ekura Simon. Era leprosy-akarta nitjata. Jesuala iltha ekuranhala marna ilkurlanaka. Arrkutja nyintantama irrpentjika bottle kurrka ntira unpa marra inthorrakarta. Ntira unpa marra lakinha relhala money kngarra inthorralanta buyemilitjata. Bottle erinha altjurilamala, arrkutja era ntira unpa marra inthorra erinha Jesuaka kapurtaka thalaka. ⁴ Nhanha aramala, relha urrputja arrpunha arrkutja ekura unpaarteraka. Etna lakinha ilarraka, “Iwunhangala era ntira unpa marra inthorra nhanha palkala wara thalaka? ⁵ Ntira unpa marra inthorra nhanha erinha kunha money kngarra inthorraka yirinthamara. Money erinha turtantama relha ilknagara ntjarranha nthamara.” Etnantama arkutja erinha iltaka.

⁶ Jesuala pula etnanha ilaka, “Erinha impai. Iwunhangala rrangkarra ekura unpaarterrama?”

Erataka nuka kangkintja kngarra ntelalhaka. ⁷ Relha ilkngara kunha kutatha rrakangkarralela nitjina, rrangkarra paka etnaka kangkintja ntelalhitjika antja namanga. Yinga pula itjala rrakangkarralela kuta nitjina. ⁸ Arrkutja erataka mpurrka nukanha mparrama ntirala parnaka, yinganha tintjiwutjinalakatjila. ⁹ Atha rrangkar-ranha nthurra ilama. Pmara nthanhala paka etna relha ntjarranha Yia Marra erinha anma kaltjinthitjina, etna yia nhanha turta ilitjinan-tema, arrkutja ekura ilpangkamala.”

Judas-anha priest-aka itornka ntjarralela angkarraka, Jesuanha etnaka lanthitjika, money-akatjila

(Matthew 26:14-16; Luke 22:3-6)

¹⁰ Kurunga Judas Iscariot, kurtungurla 12 etnakanga nyinta, priest-aka itornka ntjarrurna lhaka. Era antja naka Jesuanha etnaka lanthitjika. ¹¹ Angkatja nhanha wumala etna kangkaka. Etna Judas-anha money turta nthitjika lhelaka. Judas-anha kala nanhakan-tantama kngarra inthorra eterraka, “Nthakin-hama atha Jesuanha etnaka lanthamara?”

Jesuala Passover erinha ilkumala, Arlta Kngarra erinha turta ingkairnaka

(Matthew 26:17-30; Luke 22:7-23; John 13:21-30)

¹² Marna Ekalhaka ilpangkintjaka arlta arrkurlinyala, etna Passover lamb etnanha tuka. Jesuaka kurtungurla ntjarralantama erinha pmarraka, “Nthanhalama unta antja nama

nurna Passover tjinkarra erinha ungwanga urrkaputjika, unta erinha ilkutjinanga?”

¹³ Jesuala kurtungurla tharra ekurannya ilaka, “Town-urna lharrai. Town ekuralla artwa nyinta mpalakurna urlarra pitjitjina. Mpala aritjina era jar kwatjakarta kngetnamanga. Ekuranga tnaar-tangala lhai. ¹⁴ Iltha ekurnala era irrpunhama, mpala irrpunhaintema, ilthakurtwia ekurna turta lakinha angkai, ‘Kaltjinthanhinthanhala nganha pmarrama, Nthanhama room nuka, ekuralala atha Passover erinha ilkumara, kurtungurla nukannya ntjarralela?’ ¹⁵ Artwa erantama mpalannya room kngarritja ntelitjina, iltha kaputhala. Room nannya era kala ilknigkala, ekura ntjama turta iwukala. Room ekuralantama mpala nurnaka tjinkarra erinha urrkapai.”

¹⁶ Kurtungurla eratharra town ekurna irrpuka. Jesuaka angkatja ingkarrakantama nthurrperraka. Eratharrantama Passover tjinkarra erinha urrkapuka.

¹⁷ Kala ngurrangurrantama, Jesuannya 12 etnakalela iltha ekurna lhaka. ¹⁸ Etna manna ilkurlanamangantama, Jesuala kurtungurla etnanha ilaka, “Atha rrangkarrannya nannya nthurra ilama. Rrangkarranga nyinta, eralla lyarta nukalela manna ilkuma, era yingannya leltjaka lanthitjina.”

¹⁹ Nannya wumalla, kurtungurla etna ltarrper-raka. Nyintaminyintalantama Jesuannya pmarraka, “Yingannya unta ilama?”

²⁰ Era etnanha ilaka, “12 rrangkarranga nyinta, eralla nukalela dish nannya manna ilkuma, era yingannya leltjaka lanthitjina.

²¹ Relhaka ‘Lirakathaka nama ilutjika, Altjirraka Angkatja Imankinyala ilamala ngerra. Artwa erala Relhaka ‘Lira erinha leltjaka lanthamanga, ekura pula imampurla kngarra inthorra nitjina. Ekura marralkura namara era itja kuta alkngrakalanga paka.”

²² Etna marna ilkumalanga, Jesuala marna inaka, Altjirranha dangkilaka turta. Kurunga era marna erinha urltakamala etnanha nthaka, lak-inha angkamala, “Inarrirrai, nhanha mpurrka nuka nama.”

²³ Kurunga era cup wine-akarta inaka. Altjirranha dangkilamala, era etnanha cup erinha nthaka. Etna ingkarrakala ekuriperra ntjuka.

²⁴ Erantama etnanha ilaka, “Nhanha alhwa nuka nama, lheloalhelintja lyartinyakanha. Atha alhwa nukanha thalama ntjarranha Altjirraka tjinitjika.” ²⁵ Atha rrangkarranha nhanha turta nthurpa ilama. Lyartanga atha itja wotha wine rrangkarralela ntjutjina. Anmanta Altjirranha relha ingkarrakaka Ingkarta ntelalhamanga, atha wine arrpunhantama ntjutjina.”

²⁶ Kurunga nyintaranga lyilhamala, etna rrata-mala Olive Parturna lhaka.

Jesuala Peter-anha arrkurlantema ilaka era erinha yiparrarnitjinala

(Matthew 26:31-35; Luke 22:31-34; John 13:36-38)

²⁷ Jesualantama kurtungurla ekuranha ntjaranha ilaka, “Rrangkarra ingkarraka nukanga mpakalhitjina. Altjirraka Angkatja Imankinyala nhanga ilama, ‘Atha tnairnarintja erinha tutjina, kurunga sheep etna errarnperritjina.’

28 Altjirrala pula yinganha errilknga ntjarranga wotha kamalhelakalanga, yinga rrakangkarranga arrkurla lhitjina pmara Galilee-urna.”

29 Peter-anha pula angkaka, “Etna ingkarraka inthorra paka unkwanganga mpakalhamanga, yinga pula itja kutala unkwanganga mpakalhitjina.”

30 Jesuala pula erinha ilaka, “Atha nganha nhanha nthurra ilama. Ingula lyarta, lukaluka orrea era itjantema tharraranga ilkakalanga, unta yinganha kala tharraminyintaranga yiparrarnitjina.”

31 Peter-anha pula ekarlterramala angkaka, “Thunga arrpunha ntjarra antjerritjina yinganha unkwangakwia errilknga tutjika. Yinga pula itja kuta unkwanganga mpakalhitjina.” Kurtungurla arrpunha ntjarra turta lakinhantema ekarlterramala angkaka.

*Jesuanha Gethsemene-ala Altjirrurna ingkaka
(Matthew 26:36-46; Luke 22:39-46)*

32 Jesuanha, kurtungurla ekuranha ntjarra turtantama katha nhangurna lhaka, rretnya ekura Gethsemene. Jesualantama etnanha ilaka, “Nhanhala narrirrai. Yinga Altjirrurna ingkamalanga.”

33 Kurunga Jesuanha Peter, James, John ntjarakarta kurrka urntwarra lhaka. Jesua erantama yarna eterritikerraka, mpangkaka turta.

34 Erantama etnanha ilaka, “Yingataka ltarrpa inthorra wulhamala, ingkwa ilutjikerrama turta. Nhanhala kaaralhai, kaarra turta narrirrai.”

³⁵ Kurrka urntwarrantama lhamala, Jesuanha urlparra iwulhaka. Erantama Altjirurna ingkaka, “Unta nthurpama antja nama yinga lyarta nyingalauwutjika, ilutjika turta?” ³⁶ Era lakinha turta ingkaka, “Kaarta nukai, yinga itja antja nama nyingalauwutjika, ilutjika turta. Unta pula antja namanga yinga nyingalauwutjika, ilutjika turta, yinga kala unkwanga kangkwerramala.”

³⁷ Kurtungurla etnakurna pitjalpumala, era etnanha ankwentamanga aritjalhaka. Erantama Peter-anha pmarraka, “Unta ankwentamama? Unta yarnala kurrka wara ilk-watharra kaarra nama?” ³⁸ Rrangkarrataka kaarra nitjika, Altjirurna ingkitjika turta, errintja era rrakangkarra irrpaltherramanga warta. Arai, enka rrakangkarra nthurpa Altjiraka kangkwerritjika antja nama. Lherrintja korna pula kuta namantemala.”

³⁹ Erantama wotha lhaka Altjirurna ingkitjika. ⁴⁰ Kurunga kurtungurla etnakurna pitjalpumala, era aritjalhaka etna wothantema ankwerrakala. Etnataka porrka inthorra naka. Etnantama yarna etarlaraka erinha alpmelitjika.

⁴¹ Kala tharraminyintarangantama etnakurna pitjalpumala, era etnanha pmarraka, “Yakai, rrangkarra kutantema ankwentama, iltjerrama turta? Kala kunha. Arai, antala era kala namantama, arrpunhala Relhaka ‘Lira erinha leltjaka lanthitjika. ⁴² Mpa, kala kamerrai. Artwa erala yinganha leltjaka lanthitjinala, erataka kala pitjikantama.”

*Jesuaka leltjala erinha Gethsemane-ala er-
rkuka*

*(Matthew 26:47-56; Luke 22:47-53; John 18:3-
12)*

⁴³ Jesuanha kurtungurla ekuranha ntjarrurna angkamalangantema, Judas-anha, kurtungurla 12 etnakanga nyinta, era kala pitjikantama, worla kngarrakarta. Artwa worla nhandataka priest-aka itornka ntjarrala, artwa Intarrangaltha ntjarrala, kngarripata itornka ntjarrala turta Judas-alela yairnakala, Jesuanha errkutjika. Worla etna Jesuaka pitjika knife tjenyakarta, tnamakarta turta. ⁴⁴ Judas-ala artwa nhanha etnanha arrkurlantema ilakala, "Arai, artwa erinhala atha rrontjitjina, erinha errkwai, montjala knggetnai turta."

⁴⁵ Judas-anhantama Jesuurna arratja kuta lhaka. "Kaltjinthanhinthanhai," era erinha anparnaka. Kurunga era erinha rrontjtjaka.

⁴⁶ Artwa etnantama Jesuanha errkuka.

⁴⁷ Artwa nyinta arrpunha erala lenhala itnarlanaka, era knife tjenja ekuranhala High Priest-aka urrkapunhanhanha tuka, ilpa ekuranha inturnaka turta.

⁴⁸ Jesualantama artwa worla etnanha pmarraka, "Artwa nyilkngampa tunhatunhaka ngerrama rrangkarra knife tjenyakarta, tnamakarta turta nuka pitjika? ⁴⁹ Atha

pula rrangkarra arltamarlta temple-ala kaltjinthitjata. Rrangkarra turta yinganha itja errkuka. Lyarta pula rrangkarra yinganha errkuka Altjirraka Angkatja Imankinya nthurrperritjinanga."

⁵⁰ Kurunga Jesuaka kurtungurla ntjarrala erinha impurlalhamala, tira arrtjanaka. ⁵¹ Artwa nthitja nyinta pula itjala tira arrtjanaka. Era Jesuanga tnaartangala kuta lhaka. Etna erinha turtantama errkuka, mantarra ekuranha errkumala. ⁵² Etna pula mantarra ekuranha errkumalanga, era mantarra erinha impurlalhamala, kala ilkngarantama arrtjanaka.

Relha Jew ntjarraka itornkala Jesuanha imilaka
(*Matthew 26:57-68; Luke 22:55,63-71; John 18:13,14,19-24*)

⁵³ Kurunga priest itornka ntjarra, kngaripata itornka ntjarra, artwa Intarrangaltha ntjarra turta High Priest-aka ilthala worler-raka. Artwa lenha ntjarra, etnala Jesuanha errkukala, etna erinha High Priest-urnantama rretjingaka. ⁵⁴ Peter-ala etnanha ingkarnangala lurnaka. Etnantama High Priest-aka ilthurna irrpunhamalanga, Peter-anha High Priest-aka yard-urnala irrpunhaka. Erantama High Priest-aka urrkapunhapunha ntjarralela arrarnalhaka, urala arrtjitjinala.

⁵⁵ Priest itornka ntjarra, relha Jew ingkarrakaka council kngarra era turta antja naka Jesuanha imilitjika. Council nhanha etnanha etna Sanhedrin alpmelitjata. Etnantama artwaka yonthaka, Jesuanha ilparnitjika. ⁵⁶ Nthurra ntjarrala Jesuanha orrtjerramala ilparnaka. Angkatja etnaka pula itja loala naka. ⁵⁷ Kurunga urrputja arrpunhantama orrtjerramala angkaka. ⁵⁸ Etna

angkaka, “Nurna wuka era lakinha angkamanga, ‘Temple nhanha relhalala itakala, atha urltakitjina. Arlta tharraminyintiperra atha temple arrpunhantama ititjina. Atha pula erinha itja iltjala ititjina.’ ” ⁵⁹ Angkatja etnaka turta pula itjantema loala naka.

⁶⁰ High Priest erantama kamerramala Jesuanha pmarraka, arrpunha ntjarranga alkn-gatharra. “Unta itjala angkama, artwa nhanha ntjarrala nganha ilparnamanga?” ⁶¹ Jesuanha pula tjukunya kuta itnaka. Era itja angkaka paka. High Priest-alantama erinha wotha pmarraka, “Unta Krista erama nama, Altjirra makalaria ekura ‘Lira?”

⁶² Jesuala erinha ilaka, “Yinga kala namakwia. Anmantama rrangkarra Relhaka ‘Lira erinha aritjina, Altjirra Ekarlta Inthorraka akwampinyala namanga. Rrangkarra erinha aritjina turta matarala alhurna pitjalpumanga.”

⁶³ Nhanha wumala, High Priest era mantarra ekuranha tjepakamala, etnanha ilaka, “Iwunhangantama nurna artwaka kuta yonthitjika, erinha ilparnitjika? ⁶⁴ Rrangkarrarrpa wuka era Altjirranha arrampowumanga. Nthakinhantama rrangkarra etarlarama?” Etna ingkarrakala erinha imilaka.

⁶⁵ Arrpunha ntjarralantama ekurakarlaka palha iwuka. Etna turta annberra ekuranha korltamala, erinha tuka. Etnantama erinha pmarraka, “Nurnanha ilai, ngunhalama nganha tuka?” High Priest-aka urrkapunhapunha ntjarrala turtantama erinha errkumala tuka.

*Peter-ala Jesuanha yiparrarnaka
(Matthew 26:69-75; Luke 22:56-62; John 18:15-18,25-27)*

⁶⁶ Peter-anha nhang High Priest-aka yard-ala narlanaka. High Priest-aka marla urrkapunhapunha nyintantama ekururna pitjika. ⁶⁷ Era Peter-anha araka urala arrtjimanga. Erantama Peter-anha ilaka, “Unta kunha Jesua Nazareth-arinyalela nakantema.”

⁶⁸ Era pula yiparrarnalhaka. “Yinga itjama ekura kaltja. Yinga turta itja kaltja nhanha untala angkamalaka.” Erantama reoanga kuturna lhaka. Lukaluka orreantama ilkaka.

⁶⁹ Marla urrkapunhapunha erantama Peter-anha wotha araka. Peter erataka artwa ntjaranga kuta itnaka. Era artwa etnanha ilaka, “Era kunha Jesua Nazareth-arinyalela nakantema.”

⁷⁰ Peter-anha pula wotha yiparrarnalhaka.

Kurrka anma, artwa etnantama Peter-anha ilaka, “Untataka nthurra etnakanga nyinta namantema, unta artwa Galilee-arinya warta namanga.”

⁷¹ Peter-anha pula angkaka, “Altjirrala arama yinga nthurra inthorra angkamanga. Yinga paka orrtjerramanga, era yinganha kala errilknga tweikanhanta. Yingataka artwa ekura itja kaltja, artwa nhang ekuriperrala rrankarra angkamanga.”

⁷² Lukaluka orrea erantama wotha ilkaka. Peter-anha ilpangkakantama Jesualala erinha nhang ilakala, “Lukaluka orrea era tharraranga

ilkitjikanhangantema, unta yinganha kala thar-raminyintaranga yiparrarnitjina.” Peter-anha kala itnikantantama.

15

Pilate-ala Jesuanha pmarraka

(Matthew 27:1,2,11-14; Luke 23:1-5; John 18:28-38)

¹ Kala ingutnhalantama priest-aka itornka ntjarra kngarripata itornka ntjarralela angkar-raka, artwa Intarrangaltha ntjarralela, Sanhedrin Council etnakalela turta. Kurunga Jesuaka iltja yirnamala, etna erinha Pilate-urna rretjingaka, erinha Pilate ekura lanthaka turta.

² Pilate-alantama Jesuanha pmarraka, “Nthurrpama unta relha Jew ntjarraka king?”

Jesuaka erinha ilaka, “Lakinha unta angkama.”

³ Priest-aka itornka ntjarralantama Jesuanha kngarra ilparnaka. ⁴ Pilate-alantama erinha wotha pmarraka, “Unta etnanha tjukunyalama wurlanama? Etna pula nganha kngarra inthorra ilparnama.” ⁵ Jesuanha pula pmarna kuta itnaka. Nhanha aramala Pilate-anha kngarra tnolkaka.

Pilate-ala Jesuanha imilaka, Barabbas-anha pula era jail-anga rratalhelaka

(Matthew 27:15-26; Luke 23:13-25; John 18:39—19:16)

⁶ Passover-aka arltala, Pilate-ala kutatha artwa nyintanha jail-anga rratalhelitjata. Artwa nhanha erinha relha ntjarrala urraritjata.

⁷ Artwa nyinta jail-ala naka, rretnya ekura

Barabbas. Era artwa urrarna naka. Era nhangana artwa arrpunha ntjarralela government-aka irrpaltherrakala. Barabbas etnantama ingkarraka jail-ala naka. ⁸ Relha ntjarralantama Pilate-anha ilpangkalhelaka era artwa nyintanha jail-anga rratalhelitjika.

⁹ Pilate-alantama etnanha pmarraka, “Rrangkarra antja nama atha relha Jew ntjarraka king althakalthilitjika?” ¹⁰ Pilate-anhataka kaltja naka Priest-aka itornka ntjarrala Jesuanha ekura lantakala, etna Jesuaka antjakunya namanga, itja Jesuanha paala ntelalhakalanga.

¹¹ Priest-aka itornka ntjarrala pula relha ntjarranaha turnaka etna Pilate-anha ilitjika era Barabbas-anha jail-anga rratalhelitjika. ¹² Pilate-alantama etnanha wotha pmarraka, “Jesuanhaloa? Erinhala rrangkarra ilama era relha Jew ntjarraka king namanga. Atha erinha nthakinilitjikala?”

¹³ Etna ilkaka, “Erinha kala ntolkakanta kanthatwai.”

¹⁴ Pilate-ala pula etnanha wotha pmarraka, “Iwunhakakwia? Era itjama paala ntelalhaka paka.”

Etna pula intarralkura ilkaka, “Erinha kala ntolkakanta kanthatwai.”

¹⁵ Pilate-anha antja naka relha ntjarraka kangkwerritjika. Lakinhangana era Barabbas-anha jail-anga rratalhelaka. Era turta tjapartia ntjarranaha turnaka Jesuanha whip-ala tumala ntolkaka kanthatutjika.

Tjapartia ntjarrala Jesuanha arrampowuka, ekura kaarntakaarnta ilakwiperra kapurtaka arrarnamala

(Matthew 27:27-30; John 19:2,3)

¹⁶ Kurunga tjapartia ntjarrala Jesuanha iltha kwanurna kngaka. Etna tjapartia arrpunha ntjarranha turtantama worlilaka.

¹⁷ Kurunga etna Jesuaka mantarra thathaka ekarraka.

Kaarntakaarnta ilakwiperra turtantama mpaaramala, etna nhanha kapurta ekuranhaka arrarnaka.

¹⁸ Kurunga etna erinha arrampowumala ilaka, “Wortai, relha Jew ntjarraka king-ai.”

¹⁹ Kurunga etna kapurta ekuranha wilpawilpala tuka, ekura palha iwuka, ekuranga urlarra mparalela turta arrarnalhaka, urrkurrkintja namala ngerra.

²⁰ Etna erinha kala arrampowukalangantama, etna mantarra thathaka nhanga wotha iluka, mantarra ekuranha turta wotha ekura ekar-raka.

Kurunga etna erinha kathurna rretjingaka, erinha ntolkaka kanthatutjinala.

²¹ Tjapartia ntjarrala artwa nyintanhantama araka anpara lhamanga.

Etnantama erinha turnaka, era Jesuaka ntolka kngitjika. Artwa nhanha ekura rretnya naka Simon, pmara Cyrene-arinya. Era Alexander Rufus tharraka kaarta naka.

Tjapartia ntjarrala Jesuanha ntolkaka kanthatuka

(Matthew 27:31-44; Luke 23:27-43; John 19:28-30)

²² Etnantama Jesuanha pmara Golgotha-urna rretjingaka, nhanhatitja ‘Kaalkngaka Pmarurna’.

²³ Nhanhala etna erinha wine ntjutjika nthaka,

wine nhangha myrrh-akartakwia. Era pula itja antja naka.

²⁴ Etnantama Jesuanha ntolkaka kanthatuka. Kurunga etna mantarra ekuranha errarnpalhelaka, gamble-erramala. ²⁵ Arai, nhanha kala 9 o'clock ingutnhala naka, etna nhangha Jesuanha ntolkaka kanthatumalanga. ²⁶ Pepakarlaka, ntolka kartninyala, etna angkatja nhanha intalhelaka, "Relha Jew ntjarraka King era." ²⁷⁻²⁸ Tjapartia etna artwa korna tharra turta ntolkaka kanthatukantema. Nyinta Jesuaka akwampinyala, arrpunha ekuranga kwanginyala.

²⁹ Relha anpara lhamala ntjarra, etnantama Jesuanha kngarra arrampowuka. Kapurta ngalhamala etna erinha ilaka, "Untama Altjirraka temple urltakitjika nakala, erinha arlta tharraminyintala wotha ititjika turta?" ³⁰ Tangkalhelalhai, ntolkanga tnanpumala."

³¹ Priest-aka itornka ntjarrala, artwa Intar-rangaltha ntjarrala turta erinha arrampowukan-tema. Etna angkaka, "Era kunha arrpunha ntjarranha tangkalhelaka. Erarrpa pula yarnala tangkalhelalhama. ³² Arai, unta paka Krista era namanga, Israel-aka king, kala ntolkanga tnanpai. Nurna nhanha aramalanga nurna nganha tnakitjina." Artwa nhangha tharra, erin-hatharrala tjapartiala Jesuanga kutaka ntolkaka kanthatukala, eratharra turta Jesuanha arrampowukan-tema.

Jesuanha iluka

(Matthew 27:45-56; Luke 23:44-49; John 19:28-30)

³³ Kala ngkinyalantama, alkira era thapathaperraka, pmara ntjapara turta thapathapa naka 3 o'clock-akurtitja. ³⁴ Jesuanhantama ilkarlahaka, "Eloi, Eloi, lama sabachthani," nhanhatitja, "Altjirra nukai, Altjirra nukai, iwunhangala unta yinganha ipmintja impuka?"

³⁵ Relha urrutja arrpunha, etnala ntolkanga kuta itnarlanakala, etna Jesuanha ilkamanga wuka. Etnantama ilarraka, "Arai, erataka Elijah-aka ntangkalhama." ³⁶ Artwa nyintantama parpa irna alkumpaka arrtjanaka, nhanha turta wine tjalangkaka thankuka. Kurunga alkumpa erinha irna tjenyaka arrarnamala, era nhanha Jesuaka imarnaka, ntjutjika, lakinha angkamala, "Nurna kaaralhai aritjika. Thunga paka Elijah-anha pitjitjina erinha ntolkanga tnanpulhelitjika, thunga itja." ³⁷ Jesuanha pula intarra ilkarlahamala, kala ilukantala.

³⁸ Jesuanha warta iluka, kanha mantarra kngarritja nhang, erala temple kwanala ilparanakala, era kartninyangatjina kwaninyakurtitja tjepakalhalalhaka.

³⁹ Rome-arinya itornka nyinta Jesuanga urlarra itnarlanaka. Era Jesuanha aramalanga lakinha ngerra ilumanga, era angkaka, "Nthurrpathoa artwa nhanha Altjirraka 'lira naka."

⁴⁰ Arrkutja ntjarrala turta nhanha ingkarraka ararlanaka, tjathanga. Arrkutja nhanha etnakanga arrpunha naka Mary Magdalene, arrpunha naka Mary nhang James kurrkaka, Joses tharraka mia, Salome-anha turta.

⁴¹ Arrkutja nhanha etnataka Jesuanga

tnaartangala pitjikala, Jesuaka tangitjala nakala turta, era Galilee-alantema namalanga. Arrkutja nhanha etnantama Jesualela pitjikala, Jerusalem-angajtina.

Etna Jesuanha wolkngaka kurnaka

(Matthew 27:57-61; Luke 23:50-56; John 19:38-42)

⁴² Kala ngurrangurrantama naka, Friday arlta ekurala. Friday arltalataka relha Jew ntjarra ilkngilhitjatalka mpaarangaranga etnakanhamalkura, Sabbath arlta ekurakatjila. ⁴³ Joseph, artwa pmara Arimathea-arinya, era kunpa Pilate-urna lhaka, Jesuaka mpurrkaka enkitjika. Joseph nhanha erataka Sanhedrin council naka, artwa ilporatha pula. Era turta kaaralhaka Altjirranha ntelalhitjika era relha ingkarrakaka Ingkarta namanga.

⁴⁴ Pilate-anha pula eterraka, “Jesuanha yarna parrpa inthorra iluma.” Lakinhanganga era tjapartia itornka nhangaka ntangkalhaka, era erinha pmarraka turta, “Jesuanha kalama iluka?”

⁴⁵ Itornka era erinha ilaka, “Awa, era kala ilukakwia.” Pilate-alantama Joseph-anha ilaka era kala Jesuaka mpurrka initjika.

⁴⁶ Mantarra tjulkura marra buy-emilamala, Joseph-ala Jesuaka mpurrka ntolkanga ilulhelaka, mantarra tjulkura ekurala ilinyiwuka turta. Kurunga era mpurrka erinha wolkngaka kurnaka. Wolknga nhanhataka etna intia ngerra tnyakala. Kurunga era wolknga erinha marntilaka, parta kngarritja reoaka arrarnamala.

⁴⁷ Mary Magdalene, Mary nhangã Joses-aka mia, eratharra ararlanaka etna Jesuanha wolkn-gaka kurnamanga.

16

Jesuanha etatherramala errilknga ntjarranga kamerraka

(Matthew 28:1-8; Luke 24:1-12; John 20:1-10)

¹ Sabbath arltiperra, Mary Magdalene-ala, Mary nhangã James-aka miala, Salome-ala turta, ntira unpa marra buy-emilaka, Jesuaka mpurrka parnitjinala. ² Kurunga Sunday ingutnhala inthorra, nhangã lirngã rratitjikerramanga, etna wolkn-gurna lhaka. ³ Tjaiyala lhapalhamala etna lakinha pmarrarraka, “Ngunhalan-tama nurnaka parta kngarritja nhangã wolkn-gaka reoanga ankarti-wutjina?” ⁴ Etinyerramala pula etna araka parta erinha kala ankarti-wukala. Parta erataka kngarritja inthorra naka.

⁵ Wolknga ekurna irrpunhamala, etna artwa nthitja nyinta araka, mantarra tjulkura inthor-rakarta, akwampinyala narlanamanga. Etnan-tama tnolkaka.

⁶ Artwa nthitja era pula etnanha ilaka, “Rrangkarra itja tnolkitjika. Rrangkarra kunha Jesuaka yonthama, artwa Nazareth-arinya nhangaka, erinhala etna tnolkaka kanthatukala. Arai, era errilknga ntjarranga kamerrakala. Era itja nhanhala nama. Katha etnala erinha nhangã arrarnakala, arai. ⁷ Rrangkarra kala lharrirrai kurtungurla ekuranha ntjarranha ilitjika, Peter-anha turta, era rrakangkarranga arrkurla lhamanga Galilee-urna. Pmara

ekurakantama rrangkarra erinha aritjina. Era nhangha rrangkarranha ilaka.”

⁸ Wolknga ekuranga rratamala, arrkutja etna tira arrtjanaka. Etna errurlperrowuka, yarna turta etarlaritjikerraka. Etna pula yia nhangha Jesuanha errilknga ntjarranga kamerrakala itja relha nyintanha ilaka, etna trerrakalanga warta.

[Yia arrpunha 9-anga 20-akurtitja, etna etar-larama arrpunhala anmantama lhangakala.]

⁹ Sunday ingutnhala inthorra, errilknga ntjarranga kamerramaliperra, Jesuanha Mary Magdalene-aka ntelalhaka. Mary nhanha ekurangataka Jesuala nhangha errintja 7 unpurlenakala. ¹⁰ Mary erantama lhamala yia nhanha Jesuaka tjina ltarrpa ntjarraka ilaka. ¹¹ Etna pula erinha itja tnakaka, era ilamanga Jesuanha etatherrakala, era turtala erinha arakala.

¹² Anma Jesuanha kurtungurla tharra arrpunhaka turtantama ntelalhaka, eratharra Jerusalem-anga kathurna lhamanga. Kamerramaliperra Jesuaka mpurrka kala arrpunha ngerantama naka. ¹³ Kurtungurla nhanha tharrala turta arrpunha ntjarranha ilaka eratharrala Jesuanha arakala. Etna pula angkatja ekuratharra itja tnakaka.

¹⁴ Anmalkura Jesuanha kurtungurla 11-akantama ntelalhaka, etna marna ilkumalanga. Erantama etnanha rralthaka etna arrthata namanga. Era turta etnanha rralthaka etna turta arrpunha ntjarranha itja tnakakalanga, etna etnanha ilamalanga era kamerrakala, etna turtala erinha arakala. ¹⁵ Kurunga

Jesuala etnanha ilaka, “Rrangkarra pmara ingkarrakurna lhitjika, alha nhanhala, relha ingkarrakanha turta Yia Marra erinha ilitjika. ¹⁶ Relha etnala Yia Marra erinha tnakama, etnanha turtala rrangkarra kaltjirrpulhelama, etnanha Altjirrala tangkalhelitjina. Etna pula, etnala Yia Marra erinha itja tnakama, etnanha Altjirrala imilitjina. ¹⁷ Relha etnala yinganha tnakama, etna tjatjikarta ntjarra urrkaputjina. Etna rretnya nukanhala errintja ntjarra unpurlenitjina. Etna angkatja arrpunhakalka angkitjina. ¹⁸ Apma arrangkulthala, arrangkultha arrpunhala turta etnanha yarna errilknga tutjina. Etna turta iltja etnakanha relha menta ntjarraka arrarnamala, etnanha marrilitjina.”

¹⁹ Kurtungurla ekuranha ntjarranha nhanha ingkarraka ilamala, Altjirrala Jesuanha wothe alkirurna inetnaka. Jesua erantama Altjirrala akwampinyaka arrarnalhaka. ²⁰ Kurtungurla etna pula errarnperramala pmararrpaninhurna lhaka Yia Marra erinha ilitjika. Ingkartanha etnakalela naka, era turta angkatja etnaka ekartilaka tjatjikartala.

xcv

**Altjirraka angkatja - Arrarnturna
kngartiwukala
The New Testament in the Western Arrarnta
language of Australia**

copyright © 1997 Bible Society of Australia

Language: Western Arrarnta (Arrarnta, Western)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

PDF generated using Haiola and XeLaTeX on 21 Feb 2024 from source files dated 31 Aug 2023

e7dac67a-727e-547f-9edb-55e6c28bb3b9